

HSET MATHIO'

Caxi noe Chuaq Jesus Christ

¹ Xinoe da Jesus Christ, kon xau bùa Đawit, kon xau Apraham.

² Apraham baq da Ysac, Ysac baq da Jacôp, Jacôp baq da Juđa xam wì oh haq.

³ Juđa baq da Pharê xam Sara, Thama aih miq wa haq. Pharê baq da Êch rôm, Êch rôm baq da Aram,

⁴ Aram baq da Aminadap, Aminadap baq da Na-ach son, Na-ach son baq da Sanh môn.

⁵ Sanh môn baq da Bô-ô, miq da haq aih Rahap, Bô-ô baq da Ôbet, miq da haq aih Ruto, Ôbet baq da Jêse, Jêse baq bùa da Đawit.

⁶ Đawit baq da Salômôn, miq haq aih mai Uri.

⁷ Salômôn baq da Rôbôam, Rôbôam baq da Abija, Abija baq da Asa

⁸ Asa baq da Jôsaphat, Jôsaphat baq da Jôram, Jôram baq da Ôxia.

⁹ Ôxia baq da Jôtam, Jôtam baq da Acha, Acha baq da Êxêchia.

¹⁰ Êxêchia baq da Manase, Manase baq da Amôn, Amôn baq da Jôsia.

¹¹ Jôsia baq da Jêchônia xam wì oh haq, jò wì lam broq dïc ta Babilôn.

¹² Jò khoe lam broq dïc ta Babilôn, Jêchônia baq da Sala thi-ên, Sala thi-ên baq da Xôrôbabên,

13 Xôrobabên baq da Abi-ut, Abi-ut baq da Êliakim, Êliakim baq Axô.

14 Axô baq da Sađoc, Sađoc baq da Achim, Achim baq da Êli-ut,

15 Êli-ut baq da Êlê-axa, Êlê-axa baq da Mathan, Mathan baq da Jacôp.

16 Jacôp baq da Jôsep, ổng Mari. Mari mangai ma hauang Chuaq Jesus, aih raq Christ.

17 Qmang aih, patep enh Apraham trùh Đawit, òi đổng jah moeq jàt pôn qnhòng; patep enh Đawit trùh jò lam broq òi ta Babilôn hanoh jah moeq jàt pôn qnhòng; pang jò lam broq òi ta Babilôn trùh Chuaq Jesus Christ, hadai jah moeq jàt pôn qnhòng.

Ha-uang Chuaq Jesus

18 Bìac ma hauang ka Chuaq Jesus aih rameh, Mari miq haq, khoe têu bàu yỏc Jôsep, mahaq qnhòq acaq oe moeq qmang ti dabau, yàng aih haq khoe hadráp enh Yeang Hadròeh.

19 Jôsep ổng haq aih mangai i manoh, ùh enh òi haq pòq bàu qmèq, ta manoh haq khoe hèm ka cađac ma haq broq qmang leq ma ùh hìaq ta-uàng.

20 Mahaq, jò haq qnang hèm trùh trong aih, i moeq bình pình Chuaq trùh ti haq jò haq apô, doe ka haq: “Jôsep, kon xau Đawit, ìh apaq hòq ka yỏc Mari broq mai, ma jah qmang aih kon haq ma hadráp qmat trùh enh Yeang Hadròeh.

21 Haq aih èh ma hauang loh moeq ngai kon calô, ìh yiniq am ka haq Jesus. Kon calô aih èh ma jah dèch dèch mangai loh khoe ka yiniq lui.

²² Rìm yiniq khoe loh qmang aih dôq xit troeq bàu Boc plình ma thê bài mangai pajàu haq khoe anoe:

²³ “Kô oq, i mòeq ngai adrùh sriu chiùq hadràp, èh ha-uang mòeq ngai kon calô, Khoe aih wì yiniq ka haq Imanuli” (aih la Boc plình oe ti bên).

²⁴ Jò Jôsep khoe cadrat enh kùi, haq broq tiaq bàu bình plình Chuaq ma khoe thê, ahlài Mari broq dèh mai.

²⁵ Mahaq ùh kùi oe ti da bau trùh jò Mari ha-uang mòeq ngai kon calô, haq hi yiniq ka kon aih la Jesus.

2

Bài bỗcsi, bùa Hêrôt, cadàu lam ta Êdip

¹ Jò Chuaq Jesus khoe ha-uang ta Bêtlêhem, gùng Judê, qnhòng aih Hêrôt broq bùa, bài bỗcsi oe gùng mahì loh, trùh ta Jêrusalem

² bòch rameh: Bùa da mangai Judà ma neo ha-uang oe taleq? Nhèn khoe hnoq halǒng Haq oe pah gùng mat mahì loh, kô ìq nhèn majah khoe trùh òeq kùh waiq haq.

³ Tàng bàu aih bùa Hêrôt xam dìq mangai oe ta Jêrusalem dìq jaq crè hamàih

⁴ Bùa creò ka bài broq cla craq pajàu xam mangai hnài ranenh ta aih, haq bòch: Christ kô ìq ha-uang taleq?

⁵ Wì padreò bàu: Oe ta bêtlêhem gùng Judê majah qmang aih khoe i bàu pajàu achìh rameh:

⁶ “Ìh, Bêtlêhem, gùng Judê.

Joq qnàng ìh ùh i yeo hamoq ka bài plài ma kàn ta gùng Judê,

Majah qmang aih, enh ìh kô èh loh mòeq ngai broq Cla craq.

Haq aih ma wèq ban Isorali, aih mangai da au.”

⁷ Bùa Hêrôt creó atùng ka bài bôcsi, bôch panhìn halǒng khoe loh jò leq.

⁸ Khoe èh bùa thê wì aih lam ta Bêtlêhem, rai tanap: Pì drah lam beq, taboe chaq kon qyoh aih ma ro haq, jò pì khoe hnoq, patìn ka au loq diq, dôq au hadai trùh hu kùh waiq haq.

⁹ Khoe ka bài bùa thê, wì loh lam. Hatau, halǒng wì haq ma khoe hnoq enh gùng mat mahì loh, lam adroe ka wì haq trùh nòe kon qyoh oe men waq yòng.

¹⁰ Wì aih hnoq halǒng, manè oe i jaq cleq.

¹¹ Jò khoe mùt ta hnem, hnoq kon qyoh xam Mari miq haq, tajòe qmòe wì haq hacùn cràng ta haqneq òe deq kùh waiq. Khoe aih qnoh deh hang canaq dèch am ka haq: Wang, gahnàu, dầu xua thùm.

¹² Khoe aih, jò apô Boc plìn doe ka wì haq apaq wìh hlài dèh ta Hêrôt, wì aih hi tawìh trong qnoeq hu bròc dèh gùng.

¹³ Jò wì aih khoe lam, i mòeq bình plìn da Chuaq trùh ti Jôsep, jò haq apô, doe rameh: “Drah yòng beq, qnung kon qyoh qmat hloe xam miq haq lam amot ta diac Êdip, oe ta aih trùh jò leq au creó ka ìh, majah qmang aih kô èh bùa Hêrôt chaq jêh đac kon qyoh qmat.

¹⁴ Jôsep drah yòng, jò oe raq damang, qnung wa miq kon lam ta diac Êdip.

¹⁵ Haq oe ta gùng aih trùh jò Hêrôt cachìt, dôq xit ka bàu Chuaq ma khoe thê dèh bài pajàu tapoch: “Au khoe creò dèh ka kon loh enh diac Êdip.”

¹⁶ Bùa Hêrôt hnoq bài bỗcsi khoe qnùt rađeh, haq nòeh pi ka jaq, haq thê jêh ka cachìt dồng qyoh calô pang baiq hanam dang loh oe ta Bêtlêhem hloe xam đìq dồng ka kon qyoh ta cròng aih. Tiaq troq hì troq khê bài bỗcsi ma khoe am haq loq.

¹⁷ Qmang aih, khoe xit troeq bàu Jêrêmi pajàu Boc Plinh ma khoe anoe:

¹⁸ “Wì tàng bàu breo, cajiah.

Ta-oe, hmoe tagùng Rama

Aih bàu Rachen hmoe dèh ka wì kon

Mahaq ùh dôq cabô alòng rađeh, majah qmang aih wì haq khoe pi i.

¹⁹ Mahaq khoe ka bùa Hêrôt cachìt, i moeq bình plinh Chuaq trùh ti Jôsep jò haq apô, jò oe ta diac Êdip, thê rameh:

²⁰ “Drah yòng beq, qnung kon qyoh hloe xam miq haq hlài tagùng Isorali, majah qmang aih mangai ma chaq jêh đac kon qyoh qmat khoe cachìt.”

²¹ Jôsep drah yòng, qnung kon qyoh xam miq haq wìh hlài gùng Isorali.

²² Mahaq, jò tàng doe Achêla-u broq bùa thai dèh baq haq aih Hêrôt, qnang wèq gùng Judê, Jôsep loh ka crê pi hùa hlài ta aih, qnah hòm Boc plinh khoe anoe jò haq apô, haq hì mùt ta gùng Galili,

²³ lam rìh oe ta plài Naxaret. Qmang aih khoe xit troeq bàu bài pajàu Boc Plinh ma khoe anoe adroe: “Wì creò ka Haq mangai Naxaret.”

3

Jon Baptit, mangaipalauq trong

¹ Jò aih, Jon Baptit trùh tanòe hawit gùng Judê hnài bàu lem

² rameh: "Drah loq raxach beq! majah qmang aih diac plình trùh khoe haten"

³ Jon Baptit aih raq mangai pajàu Êsai ma khoe anoe:

"I bàu creo tanòe hawit:

Drah padon trong am ka Chuaq,

Broq ma tamang trong da Haq".

⁴ Jon caxùnh eo broq enh xàc lỏcđã, kàt caxy qnam broq xam akia, acaq toq líp xam diac xùt ta rôm wang.

⁵ Jò aih, òiđ đồng ka mangai ma oe ta Jêrusalem, xam òiđ đồng mangai oe gùng Galili, hloe xam gùng trong cròng diac Jôđan trùh òiđ ti haq.

⁶ Jò wì khoe paqnoh dèh yiniq lui, wì dôq haq broq ãptem ka rađeh ta cròng diac Jôđan.

⁷ Mahaq jò haq hnoq bàc ngai nang noe Pharisai xam mangai Sađusê trùh òòeq hu jah broq ãptem, haq doe: Bòi nang noe bìh plống meh, cabô hnài pì ma khoe loq wia ðeh ka kan noèh hì atìq meh?

⁸ Qmang qmat, thê pì loh pì lem, dôq ùh hìaq qngwan ka pì ma khoe loq raxach,

⁹ èh apaq catèh: "Apraham aih kan cadraq nhèn, majah qmang aih au doe ka pì, enh hmo kô, Boc plình thê haq loh nang noe ka Apraham dua jah.

¹⁰ Manòeq kô, chòng khoe roh òòeq jang xem long, long leq ma ùh loh pì lem, long aih èh kau hu bùh đac.

¹¹ Da au kô, au yôc diac broq baptem am ka pì, mahaq i Mangai ma trùh atìq ka au, haq aih cwàng yeo haqnèq ka au, au kô ùh tajì ka jah broq mangai wê da haq jep. Haq aih èh ma broq baptem ka pì xam Yiang Hadròeh xam ùnh.

¹² Tì Haq wê tòn timeròeq hu dè palem dèh qmau ta haneh, lènh qmau Haq don timeròeq ta hapom, manùh bùh ta ralùng ùnh ùh pat."

Baptem ka Chuaq Jesus

¹³ Jò aih, Jesus loh enh gùng Galili trùh ti Jon oe ta cròng diac Jodan, dòq Jon broq ka raðeh baptem.

¹⁴ Mahaq Jon hangah rameh: Au kô ma khòh dòq Ìh broq baptem ka raðeh, hagleq Ìh majah trùh glòq ti au? Chuaq Jesus padreo bàu:

¹⁵ Manòeq kô broq beq, bèn khòh broq ma gèh geo trong taq atòq qmang qmat. Jon hi broq tiaq bàu Chuaq Jesus.

¹⁶ Broq baptem bu khoe, Chuaq Jesus loh khoe ka diac, tajòe qmòe diac plình tapèh, Chuaq Jesus hnoq Yiang Hadròeh Boc Plình, tiàh ka trù pan loh jràp ta chac Haq.

¹⁷ I bàu enh plình doe: "Kô kon da au, mangai au ma loq waq dèh, lem manoh au rìm trong."

4

Satan aluàn Chuaq Jesus

¹ Khoe aih, Yiang Hadròeh qnung Chuaq Jesus mùt tanòe gùng hawit, dòq kan kiac padô qnùt Haq.

² Chuaq Jesus apàm ka acaq pôn jàt hì, pôn jàt mang, khoe aih haq loh qmòe ka hrah.

³ Kan kiac trùh ajang Chuaq, haq doe: Tàng joq ìh kô kon Boc Plình, thê hmo kô wia bênh beq.

⁴ Chuaq Jesus doe: “Khoe i bàu achìh rameh: Mangai rìh ùh xài canòm toq ka bênh, mahaq canòm rìm nà loh enh bàu Boc Plình”.

⁵ Kan kiac qmùt Chuaq Jesus tanòe plài hadròeh, atóc Haq nòe poc hnim kùh waiq,

⁶ rai doe: Tàng joq ìh kon Boc plình, caqnìh rađeh beq, ajoq khoe i bàu achìh rameh:

“Chuaq thê bài bình plình wèq ìh:

Wì aih hi dèch ìh ta xống,

Aih èh jènh ìh ùh i catoeh ka hmo”.

⁷ Chuaq Jesus doe: “Hadai i bàu achìh rameh: Ìh ùh khòh tì qnhro ngan Chuaq aih Boc Plình ìh.”

⁸ Kan kiac atóc Haq ta wang haqnèq hòem, patô ka Haq bài diac oe crống tanèh xam kan rahù ranhòem bài diac aih,

⁹ haq anoe: Tàng joq ìh kùn cràng kùh waiq enh ngèa au, bài diac qmat au am dống ka ìh.

¹⁰ Chuaq Jesus tapoch ka haq: “Satan wia ma khoe ka au beq, majah qmang aih i bàu khoe achìh: Ìh ep kùh waiq Chuaq aih Boc Plình ìh, rai patìh toq ka haq raq.

¹¹ Khoe aih Kan kiac hi lam, i bình plình trùh haten patìh ka Chuaq Jesus.

¹² Jò Chuaq Jesus tàng doe wì khoe rùp clêh Jon, haq wìh hlài ta gùng Galili,

¹³ Haq ùh oe ta Naxaret, mahaq lam oe ta Cabênaum, haten diac raxìq, hatìa ka gùng Sabulôn, gùng Neptali.

¹⁴ Dôq xit troeq bàu pajàu Êsai ma khoe doe:

¹⁵ “Taneh Sabulôn xam Neptali,

Oe ti trong loh ta diac raxìq, pah tau cròng diac Jodan,

Aih gùng Galili mahaq ùh xài mangai Juda...,

¹⁶ Wì aih hangui tanòe clam cluiq,

Khoe jah hnoq kan qngah kàn;

Xam bài mangai ma hangui enh caqnàm qmù kan cachit,

Kan qngah kàn khoe tồc ka wì aih."

¹⁷ Pang aih, Chuaq Jesus hi lam hnài: "Loq raxach beq, diac Plình trùh khoe haten."

¹⁸ Jò Haq qnang lam roc haqmai diac raxìq Galili, hnoq wa baiq ngai oh daq, Simôn (ma loq creo Phiero) xam oh haq Anrê, qnang tang hlàm ta diac raxìq, majah qmang aih wa aih dìq mangai ranang ka.

¹⁹ Haq doe ka wa: "Lam tiaq Au beq, au hu thê chòp lam tang hlàm mangai."

²⁰ Tajòe qmòe wa oh daq cađac hlàm, lam tiaq Jesus.

²¹ Lam yeo hangai ka aih, Jesus hnoq baiq ngai wa oh daq magnoeq hòm, Jaco kon Sêbêđê xam oh haq aih Jon, qnang hminh hlàm taboang ti Sêbêđê baq wa haq, Chuaq hi creo ka wa.

²² Tajòe qmòe wa haq hi đòeq boang xam dèh baq wa haq, hu lam tiaq Chuaq.

²³ Chuaq Jesus lam jàp gùng Galili, hnài roc hnim tagop, anoe bàu lem diac Boc Plình, rai broq brêh ka mangai yinìq ta gùng aih.

²⁴ Qmang aih, yinìq haq wì hìa jàp jìa gùng Syri, wì aràng ka haq bài mangai ùh hróc, mangai yinìq, mangai kiac pawè, ranhùa, mangai pen. Haq broq brêh dìq đổng ka wì aih.

²⁵ Èh hòim, patep enh gùng Galili, Dêcabôlo, gùng Jêrusalem, enh gùng Judê, trùh hloe pah tau cròng diac Jôđan, wì ti adrác dabau bàc haraya lam tiaq Jesus.

5

Bàu Chuaq Jesus hnài tanòe bui wang, bài xôq ramot kàn

¹ Jò Chuaq Jesus hnoq mangai bàc, haq hi tồc ta wang, jò haq khoe hangui, bài mangai tiaq hỏc thia haten ka haq.

² Haq hi tapoch đòeq hnài wì:

³ Xôq ramot am ka bài mangai xalep ta manoh, majah qmang aih diac plình aih da wì haq!

⁴ Xôq ramot am ka bài mangai crò hmoe, majah qmang aih wì haq jah alòng!

⁵ Xôq ramot am ka bài mangai loq kềm, majah qmang aih wì haq jah taneh!

⁶ Xôq ramot am ka bài mangai pangot kan taq atoq, majah qmang aih wì haq jah panàc!

⁷ Xôq ramot am ka bài mangai ma loq ha-och, majah qmang aih wì haq jah ha-och chau!

⁸ Xôq ramot ka bài mangai i manoh hliang hadròeh, majah qmang aih wì haq jah hnoq Boc Plình!

⁹ Xôq ramot ka bài mangai broq ka wì hatroq, majah qmang aih jah creò ka wì haq aih kon Boc Plình!

¹⁰ Xôq ramot am ka bài mangai lam tiaq trong taq atoq, chiùq dôq qmòe wì rùp ràđeh, majah qmang aih wì haq jah waq diac Plình!

¹¹ Xôq ramot am ka pì, jò wì hnap hnuq ka pì, rùp panì rai yôc trong dù capoch hăbo ka pì, taiq pì tiaq au.

¹² Drah lem bùi rai tadèch qmoè cliac manè, qmang aih kan baha pì oe ta Plình kàn haraya, majah qmang aih wì hadai khoe hmaq rùp bài pajàu yiang adroe ka pì qmang aih diq.

Boh xam kan qngah

¹³ Pì kô boh da crông tanèh, mahaq tàng boh aih pì xang, aih èh yôc cleq broq dôq haq jah xang hlài, boh aih oe broq cleq ma oe wìa, ep hrôq đac enh gùng, èh wì hi jôiq đac enh caqnàm jènh.

¹⁴ Pì kô kan qngah da crông tanèh kô, mòeq toq plài broq ta wang, ùh jò leq i cleq jah hanàp đac haq.

¹⁵ Hadai qmang aih, ùh i cabô bùi đen ma òeq enh qneq ka cadap, mahaq wì dèch òeq nòe haqnèq, dôq haq hu sreo qngah ka rìm ngai oe ta hnim.

¹⁶ Kan qngah pì drah sreo enh ngèa wì qmang aih diq, dôq wì jah hnoq bài kan lem enh pì, wì hu manè Baq bài pì oe ta Plình.

Pagêh bài ranenh xam bài pajàu

¹⁷ Pì apaq hèm au trùh òeq hu raliang đac ranenh xam bài bài pajàu; au trùh, ùh xài hu raliang, mahaq òeq hu pagêh.

¹⁸ Au doe qnàng ka pì, jò plình crông tanèh kô oe raq, yac ka moeq teo, moeq pliang chù, ma yì qyoh oe ta ranenh dua ùh hnhung, dua waq ka gòm trùh hì rìm yiniq jah gêh.

¹⁹ Qmang aih, mangai leq raliang đac mòeq yiniq ma yeo qyoh diq đồng ta bài ranenh kô,

rai hnài wì qnoeq broq tiaq, mangai aih èh wì doe haq mangai yeo qyoh đồng oe ta diac plình, mahaq mangai leq wèq ranenh aih, rai hnài wì qnoeq broq tiaq, mangai aih èh wì doe haq mangai yeo kàn tanòe diac plình.

²⁰ Majah qmang aih, au doe qnàng ka pì, tàng joq kan taq atoq pì ùh yeo haq nhèq ka kan taq atoq da bài thái hnài ranenh xam mangai Pharisi, pì ùh jah mùt diac plình.

²¹ Pì i tàng bàu ma doe ka wì craq calah nèh: Ìh ùh khòh jêh đac mangai, èh hòm cabô ma jêh đac mangai, haq aih ep pòq kan hadrah.

²² Yàng Au doe ka pì: “Waq toq cabô nòeh dèh ka oh daq, haq aih khoe wìa dōq ka wì tah hadrah ka haq, cabô hnap dèh ka oh daq: Raca, ep qnoh haq aih tanòe hadrah kàn dōq wì hu hadarh ka haq, cabô lech dèh ka oh daq: Ranhua, haq aih khoe khòh dōq ùnh oe ta hwinh baxa haq.

²³ Aih iq, jò leq pì aràng dèch ramènh tadreo tanòe prang, mahaq hmàng hlài oh daq i yiniq cleq ma ùh troq ka rađeh,

²⁴ drah đòeq ramènh aih enh ngèa ka prang tawìh hlài broq hatroq ka oh daq òeq, khoe hi lam dèch ramènh tadreo.

²⁵ Jò ìh lam trong ti mangai tah hadrah ka ìh, drah hatroq hōiq, tabeq haq qmùt ìh ta cwan hadrah, cwan aih aràng ìh ta cwan lình, qmang aih wì loq rùp clêh ìh,

²⁶ Au doe qnàng ka ìh, ìh caqnaih oe thiùq moeq ðùng dua ìh qnhòq jah loh enh aih.”

²⁷ Pì tàng bàu cô: “Ừh dùh tango.”

²⁸ Mahaq Au doe ka pì: “Mangai leq haqmiang mangai cadrì, ta manoh khoe hèm ùh wĩa, haq aih khoe tango ta manoh.

²⁹ Qmang aih tàng joq mat pah qma broq ka ìh loh kan yiniq lui, qngwĩa khwên cađac ma hangai ka ìh, dōq haq yac ka moeq qnah ta chac ìh pì tōm, aih dua ùh hnau òiq ka chac cìh ta hwinh.

³⁰ Tàng joq tì pah qma basrùq ìh broq yiniq lui, pot khwênh đac ma hangai ka ìh dōq haq moeq qnah ta chac ìh raliang, ùh hnau òiq ka chac cìh ta hwinh.”

³¹ I bàu doe rameh: Tàng joq mangai leq cađac mai, ep achih jàiq òoēq broq bò akang.

³² Mahaq au doe ka pì: “Mangai leq cađac mai, mahaq ùh xài taiq haq tango, mangai aih broq dèh ka mai loh mangai i tuiq tango, èh hòm, cabô yōc gùcadrì wì cađac, haq aih hadai i tuiq tango.”

³³ Pì tàng bàu doe ka wì craq calah nèh: ùh khòh loq hapah paqnùt, mahaq ajang Chuaq, ep wèq dèh bàu cla khoe hapah,

³⁴ Mahaq au anoe ka pì rameh: “Ùh dùh hapah cadèh, apaq patô tróc hu hapah, aih xài gèq Boc Plình,

³⁵ ùh dùh patô taneh hu hapah aih xài nòe Boc Plình roh jènh, ùh dùh patô Jêrusalem hu hapah, aih xài plài Bua kàn.

³⁶ Ùh dùh patô dèh gàu hu hapah, majah qmang aih mòeq hadrang xác gàu, cla pì broq dōq haq loh ka taboc loh ka gam dua ùh jah.

³⁷ Mahaq pì ep doe rameh: “Jòq jòq, ùh ùh”. Bài bàu wì ma tapoch tam aih, òiq loh enh kiac dù.

38 Pì tàng bàu doe rameh: Mat am hlài mat, hanenh am hlài hanenh,

39 Yàng au doe ka pì: “Ừh dùh àu tablêq ka mangai dù, mahaq tàng i cabô tep taböc pah qma, pì tawih am hloe ka wì taböc pah qngeo,

40 Tàng i cabô enh tah hadrah ka ìh ðòeq chaq trong lêh yöc da pì eo ðêq, ðôq haq wì yöc hloe xam eo yôh enh gùng;

41 tàng i cabô thê pì lam moeq apot trong ti wì haq, pì lam baiq apot trong ti wì.

42 Cabô bòch pì cleq, am beq, cabô enh bòch ðò da pì cleq, apaq hwi ðac ta qnoeq.”

43 Pì lah tàng wì doe qmang kô: Thê loq waq ka mangai haten hatia ka pì, git ka mangai tablêq ka pì.

44 Yàng Au doe ka pì rameh: “Thê loq waq ka mangai git ka pì, rai waiq khăn ka mangai ma loq rùp baxa pì.

45 ðôq pì jah broq kon Baq pì oe ta plình, majah qmang aih Haq broq mat mahì töc ðòeq sreo ka mangai dù xam mangai lem, broq mè ka mangai lem xam mangai dù.

46 Tàng pì loq waq toq ka mangai ma loq waq ka pì, aih èh pì jah baha cleq? Bài mangai ma yöc thèq ma ùh hadai broq qmang aih?

47 Tàng pì ðìh ðèh toq oh ðaq, aih i crài cleq ka wì qnoeq? Bài wì enh gùng ma ùh hadai broq qmang aih?

48 Qmang aih, pì ep geo rìm trong qmang ka Baq pì oe ta plình geo rìm trong.”

Kan tabàih, waiq khàn, apàm ka acaq

¹ Rabiaq oq, apaq broq biac taq atoq cla raðeh enh ajang mat wì qnoeq waq ka wì hnoq. Tàng ùh meh, Baq pì oe ta plình ùh baha ka pì cleq.

² Qmang aih, jò pì tabàih, paq hlui taliaq enh ngèa dèh cla, troeq bài mangai toq ti patiah ma loq broq nòe hnìmh tagop, waq ka wì qnoeq hnoq raðeh. Joq qnàng Au doe ka pì, wì aih khoe jah qmòe dèh kan baha.

³ Mahaq jò pì tabàih, apaq dōq pah qngeo loq tì pah qma broq cleq,

⁴ dōq kan tabàih aih jah hlèp; Baq pì, aih Mangai xau hnoq tanòe hlèp, aih èh haq ma baha ka pì.

⁵ Jò pì waiq khàn, apaq broq qmang ka bài mangai toq ti patiah, wì haq enh toq yòng waiq khàn tanòe hnìmh tagop, tanòe trong lam, đòeq dìq ka phù cròng mangai hnoq ðeh hra. Joq qnàng Au doe ka pì, wì aih khoe jah qmòe dèh kan baha.

⁶ Mahaq jò pì waiq khàn, mùt dèh ta bluàng, clòng qmang, khoe aih hi waiq khàn dèh ka Baq pì, oe ta nòe hlèp aih, Baq pì aih Mangai xau hnoq tanòe dìq jaq hlèp, aih èh ma baha ka pì.

⁷ Jò pì waiq khàn, ùh dùh yōc bàu capoch lauq capoch clò ùh loh qmòe ranenh troeq wì enh gùng, majah qmang aih wì haq xoh ðeh capoch bàc aih i mangai tamàng.

⁸ Qmang aih, pì apaq top dua wì haq, Baq pì khoe loq pì qnang enh cleq adroe ka pì bòch Haq.

⁹ Qmang aih pì waiq khàn rameh:

“Waiq Baq nhèn oe ta plình;

Yiniq Baq jah hadròeh;

¹⁰ Diac Baq jah trùh;

Manoh Baq jah gêh, oe ta crông taneh tiah ka oe ta plình!

¹¹ Am ka nhèn dahwèq acaq qnang lem ka hi kô;

¹² Cađac da nhèn yiniq lui, qmang ka nhèn cađac ka mangai broq yiniq lui ka nhèn;

¹³ Paq dôq nhèn clih ta kan padô qnùt, dèch nhèn claih enh kan dù! (Majah qmang aih: diac, kan itai, kan ranhòm, oe diq ta Baq mỏeq đòe.)

¹⁴ Majah qmang aih, tàng joq pì cađac yiniq lui mangai qnoeq ma broq ka pì, Baq pì oe ta plình hanoh cađac yiniq lui da pì.

¹⁵ Mahaq tàng joq pì ùh cađac yiniq lui wì qnoeq, Baq pì oe ta plình hanoh ùh cađac da pì yiniq lui.

¹⁶ Jò pì apàm ka acaq, apaq broq dèh mangò troeq bài mangai toq ti patiah, wì aih broq dèh ma haqnhuaq ta mùh mat, waq ka wì qnoeq loq ka wì haq apàm ka acaq, Joq qnàng au doe ka pì, wì aih khoe jah qmòe dèh kan baha.

¹⁷ Yàng jò ìh apàm ka acaq, xùt dầu ta gàu, qmùq mat.

¹⁸ Dôq wì qnoeq ùh hìaq loq pì qnang apàm ka acaq, mahaq toq Baq ìh mangai ma xau hnoq tanòe, aih èh haq ma hu baha ka pì.

¹⁹ Pì apaq don đòeq kùng hang oe crông taneh, aih nòe i catia, i kan axiang loq broq haq om cađac èh mangai atùng loq kóch radua, chìa panàt hu yốc atùng,

²⁰ mahaq ep don đòeq ta plình, nòe aih ùh i ka catia, ùh i kan axiang pa-om cađac, ùh i mangai atùng chìa panàt, kóch radua hu atùng.

21 Majah qmang aih, kùng hang pì oe taleq, manoh cliac pì hadai oe ta aih.

22 Mat aih ðen da chac hamac. Tàng joq mat ìh qngah lem, aih ðiq ka chac pì jah qngah,

23 tàng mat ìh ùh lem, ðiq chac hamac ìh loh ðong ka clam cluiq. Qmang aih, tàng joq kan qngah oe ta ìh aih loh ka clam cluiq, aih èh kan clam kô kàn ðàng leq!

Kan loq lèt.

24 Ùh bô jah broq hapõng ka baiq toq craq, majah qmang aih haq loq git ka mangai kô èh loq waq ka mangai tau, ùh meh haq padèch mangai kô, mahaq jù caðac magai tau. Pì ùh jah rai broq hapõng Boc Plình rai broq hapõng Mamon.

25 Aih ìq Au ma jah doe ka pì: “Apaq taiq kan rìh raðeh ma lèt ka trong acaq ôq, hanoh apaq taiq chac hamac ma hu lèt ka raðeh caxùnh cleq. Kan rìh ma ùh yeo kàn ka dahwèq acaq, chac hamac ma ùh xài yeo kàn ka dahwèq caxùnh?

26 Ngan chim oe ta tróc: haq ùh i rai adrech, ùh i gat, hanoh ùh i don ðòeq ta hapom aih dua Baq pì oe ta plình ban haq. Pì ma ùh xài yeo canaq ùh hnau ka chìm aih?

27 Qnah hòm, tagne pì qmat i ka cabô taiq haq loq lèt ma broq ka raðeh jah halình tam moeq ahyàc ùh?

28 Dahwèq caxùnh pì lèt dèh? Haqmiang ngan bài riang tacreo oe ta gùng honh qmang leq, ùh i abroq, ùh i caxènh brai,

29 mahaq au doe ka pì, yac ka bùa Salômôn nhòm ðàng leq, dua qnhòq lah caxùnh moeq blah eo leq ma lem ðàng bài riang aih.

³⁰ Pì qmat joq mangai biaq manoh lùì, nhat oe tagùng, aih adrech hì kô oe rìh, hì da èh bùh ta ùnh. Boc Plình dua am haq caxùnh lem qmang aih, loq ka pì!

³¹ Qmang aih, pì apaq lèt òeq hu doe: Bèn acaq cleq? Ôq cleq? caxùnh cleq?

³² Majah qmang aih, wì mangai enh gùng cadàu tiaq rìm yiniq aih, Baq pì oe ta plình khoe loq pì i yiniq waq ka bài trong aih.

³³ Mahaq adroe dìq dǒng, drah chaq diac Boc Plình xam kan taq atoq da Haq òeq, bài yiniq aih èh, brì ka Haq baha tam ka pì.

³⁴ Qmang aih, apaq lèt dèh ka hì da èh, hì da èh òeq da hì da èh. Kan xalep hì leq lap qmòe ka hì aih.

7

Ti tah hadrah ka mangai qnoeq

¹ Pì apaq ti tah hadrah dèh ka wì qnoeq, dōq wì qnoeq hadai ùh hì a tah hadrah ka pì.

² Pì tah hadrah ka wì qnoeq qmang leq, wì hanoh tah hadrah hlài ka pì qmang aih, pì dèch ka wì dāng leq wì dèch hlài ka pì dāng aih.

³ Hagleq pì hnoq khēnh ta mat oh daq, mahaq ùh hnoq long tanòng ta mat cla?

⁴ Gleq ma hù a doe ka oh daq: Dōq au doeh khēnh loh khoe ka mat ìh, yàng ta mat cla i qmòe long tanòng?

⁵ Wùih! Bài mangai toq ti patìah meh, angoe aih doeh long tanòng loh khoe ka mat cla òeq, khoe aih men xau hnoq òeq hu doeh khēnh ta mat oh daq.

Bàu hnài qnoeq

⁶ Apa q khwên h ka ko q bài dahwè q hadroè h, apa q caqnì h ngò c enh ngè a ka chù a, be q ha q jô i q cađac, khoe aih ha q hwì hlài nhah glò q cla pì.

⁷ Bò ch be q, aih è h hi jah, cha q be q, aih è h hi glàm, clò q qmang be q, aih è h qmang hi pè ch.

⁸ Majah qmang aih, wa q to q mangai le q bò ch, mangai aih hi jah, mangai le q ti cha q mangai aih hi hno q, mangai le q clò q qmang, qmang hi tapè ch.

⁹ Ta qne pì, i mangai le q jò kon bò ch ã ê nh maha q pì am ka ha q hmo?

¹⁰ Tàng ù h meh, kon bò ch ka maha q pì am bì h?

¹¹ Qmang aih, qmè q troe q pì qmat, xò q oe lo q am dè h ka kon yini q lem, lo q ka Ba q pì oe ta plì nh, Ha q ma ù h am yini q lem ka bài mangai le q cre o bò ch ha q qmò h?

¹² Qmang aih, trong le q pì ma enh wì qnoeq bro q ka rađeh, pì ep bro q trong aih am ka wì, aih ra q ranen h xam bàu pajàu.

¹³ Dra h mù t qmang ma chit, majah qmang aih qmang ma kàn xam trong ma anò h qnung trù h ta kan lù ng pac.

¹⁴ Maha q qmang qyoh, trong ù h anò h qnung trù h ta kan rì h, ã i a q ngai ra q cha q ma hno q.

Ngan yini q bro q aih ma canau ka mangai patì ah

¹⁵ Ngan o q, lo q i bài pajàu patì ah, bài mangai caxù nh ca qmoc trù u lam trù h ti pì, maha q enh dalam aih ko q yiang to q ti kap hì t.

¹⁶ Pì ngan plì ma canau ka haq. Aleq lah i cabô git plì nño tanòe xèm yila, git plì póc tanòe xèm yila cadê?

¹⁷ Qmang aih, toq long lem men loh plì lem, long qmèq loh plì qmèq.

¹⁸ Long lem ùh jò leq loh plì qmèq, long qmèq hadai ùh jò leq loh plì lem.

¹⁹ Waq toq long leq ùh loh plì lem aih èh ep kau bùh cađac ta ùnh.

²⁰ Aih èh, pì ngan plì haq men canau ka wì haq.

²¹ Ùh xài waq toq ka cabô hi creo ka au: Chuaq, Chuaq, aih diq jah mùt diac plình, mahaq toq magai leq ma broq tiaq manoh Baq au oe ta plình.

²² Hì aih èh i bàc mangai doe ka au: “Chuaq, Chuaq, ùh xài nhèn kô raq ma khoe hmaq canòm yiniq Ìh òòeq tapoch pajàu? Canòm ka yiniq Ìh òòeq drùh hnan kiác chốc? Canòm yiniq Ìh broq bàc trong halac qmòh?

²³ Jò aih èh, au hi capoch hloh ka wì haq: “Wùih òài mangai broq trong dù meh, Au qnhòq lah qnì ka pì, drah wia khoe ka Au.”

Ep broq tiaq bàu Boc Plình

²⁴ Qmang aih èh, mangai leq tamàng rai broq tiaq bàu au anoe kô, haq aih tiaq ka mangai rabiaq broq hnem ta crông hmo talech.

²⁵ Yac ka i mè dèh, i diac trùh, cayeo hlui, glàm caqnhùt hnem aih, dua ùh raliang, majah qmang aih haq khoe broq nòe hmo càn.

²⁶ Mahaq mangai leq khoe tàng bàu au anoe kô yàng ùh broq tiaq, haq aih budàng mangai ratùt broq hnem ta braih.

²⁷ I mè dêh, diac trùh, cayeo hlui, glàm caqnhùt ta hnem aih, hi ralàih, raliang bàc oe i jaq cleq.

²⁸ Jò Jesus bu khoe ka anoe bàu aih, bài wì diq jaq hamàih ka bàu haq hnài,

²⁹ Majah qmang aih bàu haq hnài tìah gleg i cwìang, ùh xài troeq da bài mangai hnài ranenh.

8

Broq brêh ka mangai bacùn

¹ Jò Chuaq Jesus loh enh bui wang, i bài mangai pì cajaq tiaq Haq.

² I moeq ngai bacùn thia haten rai kùh haq, rai doe: Waiq Chuaq, tàng joq Ìh ma waq, Ìh broq au brêh.

³ Jesus hnhu tì bèq haq, rai doe: “Au waq, brêh beq.” Tajòe qmòe jò aih raq mangai bacùn jah brêh.

⁴ Chuaq Jesus tanap ka haq: “Ngan oq, ùh dùh anoe ka cabô, mahaq ìh lam patô rađeh ka bài pajàu kàn, rai dèch ramènh qmang ka Môise khoe hnài, hu panhìn ka wì aih.

Hapõng cwan loh ka yinìq

⁵ Jò Chuaq Jesus mùt ta plài Cabênaum, i moeq ngai cwan wèq lình trùh tì Haq,

⁶ rai creo dang: Waiq Chuaq, mangai hapõng au loh ka pen, kùì mòeq nòe ta hnìm au, haq jìq pì cajaq.

⁷ Chuaq Jesus doe: “Au lam ta aih hu broq ka haq jah brêh.”

⁸ Cwan aih padreo bàu: Waiq Chuaq, au kô ùh tajì ka jah òh Ìh mùt dèh ta hnìm, mòeq nà bàu Ìh tapoch raq, hapõng au hi jah brêh.

⁹ Majah qmang aih, au oe ðeh enh qneq ka cwàng wì qnoeq, au hanoh i bài linh oe enh qneq ka au, au the mangai kô: lam beq! haq aih hi lam. The mangai qnoeq: Drah trùh jang kô! mangai aih hi trùh, au the ðeh hapõng: Drah broq yiniq kô, haq aih hi broq.

¹⁰ Tàng bàu aih, Chuaq Jesus loh ka hamàih, haq doe ka bài mangai ma tiaq raðeh rameh: "Jòq qnàng au doe ka pì, au qnhòq lah hnoq ta Isorali, i mangai leq i manoh lùì kàn qmang qmat.

¹¹ Au anoe hloe ka pì, i bàc ngai enh gùng mat mahì loh, enh gùng mat ma hì clìh, trùh hangui acaq pajùm moeq aniang ti Apraham, Isac, Jacôp, tanòe diac plình.

¹² Yàng bài kon cla diac aih, wì khwênh qnoh ðac enh gùng tanòe clam cluiq, ta aih èh i toq kan crò hmoe, ta- oeh, cadrit hanenh.

¹³ Chuaq Jesus doe ka cwan aih: "Hlài beq, ìh jah tìah ðeh ka manoh ìh ma khoe lùì aih." Wop jò aih raq, mangai hapõng haq jah brêh.

Jesus broq brêh am ka bàc ngai

¹⁴ Khoe aih, Chuaq Jesus mùt ta hnim Phiero, hnoq miq mai Phiero qnang kùì ta aniang, rai tôq tanget.

¹⁵ Chuaq Jesus yõc tì bèq mangai yiniq aih, kan tôq taqngèt hi ðìq, khoe èh haq aih hi yòng patìh ka Chuaq Jesus

¹⁶ Trùh xèq, wì aràng ka Chuaq Jesus bàc ngai kiac chõc pawè, Chuaq Jesus yõc bàu capoch drùh qnoh bài kiac aih, rai broq brêh ðìq ðõng mangai ùh hrõc.

17 qmang aih dôq xit troeq bàu Pajàu Êsai ma khoe anoe:

Haq khoe doeh dǒng kan yinìq bèn,
Pòq wê kan ùh hrǒc bèn.

Broq qmang leq men jah lam tiaq Jesus

18 Jò Chuaq Jesus hnoq bàc ngai oe dudan ka dađeh, haq the tǒc apah tau diac.

19 I moeq ngai hnài ranenh trùh ti Haq rai anoe:
Ìh lam taleq, au tiaq ta aih.

20 Jesus padreo bàu: “Bàì chia i trom, chìm i pù, mahaq Kon Mangai ùh i qmòe ka nòe hu angèn gàu.

21 Mangai qnoeq hòem doe: Waiq Chuaq, Ìh dôq au hlài catùh hanang dèh baq òeq.

22 Mahaq Chuaq Jesus doe ka haq: “Lam tiaq au, dôq da mangai cachit catùh mangai cachit.”

Bahùt taqne diac rasìq

23 Khoe aih, Chuaq Jesus loh ta boang, bàì mangai tiaq hǒc hi tiaq haq.

24 Cadoe, ta diac raxìq loh bahùt kàn, diac lai laq yòng haqnheq enh gùp qmòe boang. Mahaq Chuaq Jesus oe raq kùi.

25 Bàì mangai tiaq hǒc, thia haten padriù haq, wì doe: Waiq Chuaq! Ìh dang nhèn diq, nhèn cachit manòeq kô raq!

26 Jesus doe: “Bàì mangai bìaq manoh lùì, hagleg pì ma yùq? Chuaq Jesus yòng tagàih ka cayeo xam diac raxìq, diq baiq hi hatinh rangep hloe.

27 Dìq dǒng ka wì aih hamàih bòch dabau: Mangai kô ìq cabô? Jaq wa cayeo wa diac dua iu bàu Haq?

Baiq ngai oe ta Gadara i kiac oe ta chac

²⁸ Jò Chuaq Jesus khoe trùh pah tau ka diac, haq hnoq baiq ngai i kan kiac oe ta chac, wa aih loh enh cadràng hanang tùh glàm Haq. Wa aih dù haraya, pi i cabô oe hùà lam pagat trong aih.

²⁹ Wa cachech qmòe cadêh: Waiq Kon Boc Plinh, bèn kô iq ep cleq ka dabau, ajoq Ìh trùh tacô, òòeq hu baxa nhèn adroe ka jò ùh xài?

³⁰ Wop jò aih diq, i moeq calùh chùà qnang acaq.

³¹ Bài kiac bòch Chuaq Jesus rameh: Tàng joq Ìh hnan nhèn loh, Ìh am nhèn jah mùt ðeh ta bài chùà tau.

³² Haq thê bài kiac: "Drah lam beq! Bài kiac loh enh wa aih, hi mùt hloe ta calùh chùà, tajòe qmòe jò aih dìq ðống ka calùh chùà oe enh crialng tawang clàm loh ta diac raxìq, cachit ðống ta diac.

³³ Bài mangai ban chùà hi cadàu lam amot, mùt taplài taqmon hlài bài yiniq wì haq hnoq, anoe hloe xam biac wa baiq ngai kiac ma pawè ka wì tàng.

³⁴ Dìq ðống ka wì gùng aih loh tạt Chuaq Jesus, jò wì bu hnoq haq, wì drah thê haq lam taqnoeq.

9

Broq brêh ka mangai pen

¹ Chuaq Jesus loh taboang wìh hlài pah tau diac raxìq, haq hlài dèh ta plài.

² I wì tòng aràng ka haq moeq ngai pen kùi ta dra drah. Chuaq Jesus hnoq wì aih i manoh lùì, Haq doe ka mangai pen: "Ừh dùh yùq dèh kon, yiniq lui kon khoe jah caqnaih."

³ Jò aih, i toq biaq ngai ma hnài ranenh oe ta aih, wì haq hèm ta manoh: Mangai kô capoch joq loq hanhèq.

⁴ Yàng Chuaq Jesus loq ka manoh wì haq hèm cleq, haq hi doe rameh: "Hagleq ta manoh pì majah hèm qmèq qmang aih?"

⁵ Baiq nà bàu kô: moeq aih doe "Dìq ka yiniq lui kon khoe caqnaih, tàng ùh meh doe drah yòng cadiang lam beq, maleq ma yeo hlàu ka tapoch?"

⁶ Mahaq au waq ka pì loq Kon Mangai oe ta crông taneh kô i cwàng òdeq caqnaih yiniq lui". Khoe aih, Chuaq Jesus thê mangai pen: "Yòng beq, xùì da ìh dra drah qmat hlài ta hnem."

⁷ Mangai pen padinh yòng hlài dèh ta hnem.

⁸ Dìq ka phù crông hnoq kan halac aih, mangai leq mangai meh crè ðeh hra, rai manè apôi Boc Plinh khoe am ka kon mangai cwàng itai qmang aih.

⁹ Jò Jesus lam khoe ka nòe aih, Haq hnoq moeq ngai yiniq haq Mathio qnang hangui tanòe hnem yõc thèq, Chuaq Jesus creò ka haq: "Drah lam tiaq au", haq aih padinh yòng, lam tiaq Chuaq Jesus.

¹⁰ Yàng jò wì qnang hangui acaq ta hnim Mathio, i bàc ngai yõc thèq xam bài mangai ùh wìa trùh acaq moeq qmang ti Chuaq Jesus xam bài mangai tiaq hõc haq.

¹¹ mangai Pharisi hnoq qmang aih, wì haq capoch ka bài tiaq hõc Chuaq Jesus: Hagleq mangai hnài da pì qmat majah hangui acaq pajùm ti bài mangai yõc thèq xam ti bài mangai ùh wìa?

¹² Chuaq Jesus tàng bàu aih, haq doe ka vì: "Mangai tadèh ma i waq mangai broq jreo, mangai ùh hrõc ma waq ka mangai broq jreo.

¹³ Lam beq, rai boq ngan bàu kô anoe cleq: Au enh kan loq waq, au ùh ngèh trùh ramènh tadreo. Majah qmang aih, au trùh ta kô ùh xài òòeq creò ka bàì mangai taq atoq mahaq òòeq creò ka mangai i yiniq lui."

¹⁴ Jò aih, bàì mangai tiaq hóc Jon lam chuaq Chuaq Jesus, wì bòch: Hagleq nhèn xam bàì mangai Pharisi apàm ka acaq, yàng da bàì mangai ma tiaq hóc Ìh aih ùh dùh apàm ka acaq?

¹⁵ Chuaq Jesus padreò bàu: "Jò cla kon òng oe raq oe mòeq qmang ti wì bua haq lam acaq yiniang, wì aih mangò qmang leq ma wìa? Mahaq trùh hì leq wì hì qnung đac cla kon òng, jò aih èh bua haq ma apàm ka acaq.

¹⁶ Ùh i ka cabô yóc ahyah neo òòeq clep tanòe eo kùn, tàng joq broq qmang aih haqnech maneo aih èh haq tadùng hyah hloe ka blah eo, nòe hyah aih yeo qmèq tam.

¹⁷ Hadaì qmang aih, ùh i mangai leq yóc alac neo ùc ta abôq akia dùnh, tàng broq qmang aih, abôq aih padah, alac aih ta-ùc, abôq aih hì raliang. Mahaq alac neo wì ùc ta abôq akia neo, aih èh ma hì jah wèq dìq baiq.

Kon cadri Jairu xam mangai craq cadri dahrôq mahim

¹⁸ Jò Chuaq Jesus qnang tapoch qmang aih, i moeq ngai wèq hnem tagop qyoh cadiang mùt, hacùn cràng enh ngèa ka Chuaq Jesus rai anoe: Kon cadri au neo pat, au canòm đeh ka Ìh trùh, yóc tì bèq chac haq, aih èh haq jah rìh hlài.

¹⁹ Chuaq Jesus hì yòng lam, bàì mangai tiaq hóc hadailam ti haq aih.

²⁰ Hanoh jò aih diq, i moeq ngai gucadrì, haq loh ka dahrôq mahim khoe jah mòeq jàt baiq hanam, thia haten enh rù bèq haqmai eo Chuaq Jesus.

²¹ Majah qmang aih, haq xan hèm yôt ðeh ta manoh: Tàng joq au jah bèq ðeh toq haqmai eo haq raq, au loq ðeh jah brêh.

²² Chuaq Jesus wìh hlài, hnoq gucadrì aih, Haq doe: “Ùh dùh yùq, toq cajap manoh oq! Manoh lùì da kon khoe broq kon jah brêh”, mangai cadrì aih jah brêh hloe jò aih raq.

²³ Jò Chuaq Jesus trùh hnim mangai wèq hnim tagop, hnoq bài mangai hlui taliaq, hnoq wì broq ma tagruàng.

²⁴ Haq doe ka wì: “Pì loh enh gùng beq, kon cadrì qyoh kô ùh i cachit, haq qnang kùì”. Tàng bàu aih wì do halê ka Haq.

²⁵ Jò wì aih khoe loh diq enh gùng, Chuaq Jesus thia carùp tì kon qyoh aih haq hi yòng hangui.

²⁶ Bìac kô, jàp cròng aih hìa ðeh hra.

Broq brêh ka mangai ùh xau, mangai làu

²⁷ Chuaq Jesus loh enh aih, i baiq ngai ùh xau tiaq haq rai creo: Kon bùa Dawit! Ha-och ka ma diq.

²⁸ Jò khoe mùt ta hnim, wa aih trùh, Chuaq Jesus bòch wa haq: “Chôp lùì au jah broq am ka chôp trong chôp ma ngèh kô qmòh?” Wa aih padreo bàu: Joq ma lùì Ìh broq jah.

²⁹ Chuaq Jesus bèq mat wa aih rai doe: “Tiaq manoh chôp khoe lùì, chôp jah qmang aih.”

³⁰ Mat wa haq jah xau hoq hlài. Chuaq Jesus yǒc bàu panhet wa haq: “Ngan oq, chòp ùh dùh dōq cabô loq biac kô!”

³¹ Mahaq, loh bu khoe enh hnim, wa anoe yiniq Haq jàp jìa tagùng aih.

³² Jò qnang loh enh aih, wì aràng ka Chuaq Jesus moeq ngai lâu i kiac oe ta chac haq.

³³ Jò Chuaq Jesus khoe drùh qnoh kiac, mangai aih jah tapoch. Bài phù cròng hamàih ðeh hra wì ta anoe kà da bau: Qnhòq lah hnoq yiniq qmang kô tanòe Isorali.

³⁴ Mahaq da mangai Pharisi doe: Haq qmat yǒc cwàng enh cla craq kan kiac ðòeq drùh kiac.

³⁵ Chuaq Jesus lam rìm gùng, rìm plài, hnài roc hnim tagop qyoh, anoe ka wì loq bàu lem diac Boc plình, rai broq brêh bàc ngai yiniq, ùh hróc.

³⁶ Jò Chuaq Jesus hnoq bài mangai bàc, ta manoh haq ha-och ka wì, majah qmang aih, wì nanxa, prah priang, tìah ka trìu ùh i ka mangai ban.

³⁷ Haq doe ka bài mangai tiaq hǒc rameh: Qmau kô bàc, mangai gat aih toq bìaq,

³⁸ Qmang aih, drah creò ka Cla craq qmau qnoh tam bình gat loh ta ruàng haq.

10

Jesus thê moeq jàt baiq ngai loh lam

¹ Chuaq Jesus creò ka moeq jàt baiq ngai tiaq hǒc trùh tì cla haq, am ka wì cwàng drùh hnan kiac chǒc jròng, rai broq brêh kan yiniq tôq, ùh hróc.

² Kô hiniq moeq jàt bài ngai Tiaq cla: mangai baxèm aih Simôn, bèn loq xan creò ka haq Phiero,

xam Anrê (aih oh haq); Jaco kon Sêbêdê xam Jon oh haq,

³ Philip xam Bathêlêmi; Thôma, xam Mathio (mangai yôc thêq); Jaco kon Aphê, xam Thadê,

⁴ Simôn mangai Cana-an, xam Judâ Icariôt, mangai ma blòq Chuaq Jesus.

⁵ Aih raq, moeq jât baiq ngai Tiaq cla, Chuaq Jesus thê wì loh lam rai tanap ka wì haq: “Apaq lam tanòe ùh xài mangai Judâ, ùh dùh mùt ta plài leq da mangai Samari.

⁶ Mahaq lam chaq bài kon trùu Isorsli ma khoe hnhung.

⁷ Jò lam ti trong pì anoe bầu kô: “Diac Plình trùh khoe haten”.

⁸ Broq brêh ka mangai ùh hrôc, broq ka mangai cachit rih hlài, broq ka magai bacùn jah brêh, drùh hnan kan kiac jròng. Pì khoe jah dech pì hadai am dech.

⁹ Ta caqnam pì ùh dùh catonh wê dèh ka wang, yac ka bac jèn hadai.

¹⁰ Lam ti trong ùh dùh wê ayôp, apaq racop baiq blah eo, yac ka jep hanoh qmang aih, apaq wê long ka nhra, majah qmang aih, yiniq da pì ma abroq khòh jah acaq.

¹¹ Pì mùt gùng leq, plài leq pì ti chaq ngan mangai leq ma tajì ka ðih pì, khoe aih oe hnim wì haq trùh jò pì loh lam.

¹² Jò pì mùt hnim leq, waiq kan catèm am ka hnem aih;

¹³ Tàng joq hnim aih tajì, kan catèm enh pì hi loh am ka wì haq, tàng joq ùh aih, kan catèm pì hlài ta cla pì.

14 Tàng mangai leq ùh òh pì, ùh tamàng bàu pì, jò pì loh enh hnim aih, plài aih, drah hapùih blo ma top ta jènh pì.

15 Joq qnàng Au doe ka pì, trùh hì hadrah èh, gùng Sôdôm xam gùng Gômôro pòq kan hadrah yeo biao ka wì aih.

16 “Au thê pì loh lam tiah ka trùu oe taqne calùh koq yiang. Qmang aih pì ep rabiaq qmang ka bìh, khun khuq tiah ka trù.

17 Pì ep hamang ngan oq, majah qmang aih èh wì rùp qnoh pì tanòe hadrah, jêh pì roc hnim tagop qyoh,

18 Qnah hòh, taiq au kô èh wì majah rùp qnoh pì enh ngèa bài cwan bài bùa, òe q pì yòng anoe enh ngèa ka wì haq hloe xam bài ùh xài mangai Juda.

19 Mahaq jò wì rùp pì, apaq lèt ka anoe qmang leq, anoe bàu cleq, gleq ma jah qmang aih, bàu leq ma troq ka anoe, trùh jò aih èh hi am ka pì.

20 Aih ùh xài cla pì pì capoch òeh ma joq qnàng aih Yiang Hadròeh Baq pì oe enh dalam ka pì capoch qnoh.

21 Daq rùp dèh oh, dòq wì jêh òac, baq rùp dèh kon dòq wì jêh òac, mangai kon yòng tablêq dèh ka miq baq, waq ka òiq baiq wa aih cachit.

22 Jao yiniq au kô èh, òiq ka phù cròng majah tagit ka pì, mahaq mangai leq cajap manoh trùh lùch trùh gèh, mangai aih èh ma jah dèch.

23 Jò wì rùp pì ta plài kô, pì puplech lam ta plài qnoeq, joq qnàng au anoe ka pì, pì lam qnhòq jàp ka plài mangai Isorali, Kon mangai khoe trùh.

24 Mangai tiaq hóc ma lah yi ùh hnau ka mangai

hnài, hapǒng malah yi ùh hnau ka cla wì craq.

²⁵ Mangai tiaq hǒc jah dàng mangai hnài, hapǒng jah dàng cla wì craq aih khoe wìa. Tàng joq wì khoe doe ka cla wì craq ta hnim aih Bênxêbun, loq ka mangai ta hnem.

²⁶ Qmang aih, pì apaq yùq, ùh i cleq cadoc èh ma ùh ep paqnoh dǒng, ùh i cleq bahlèp atiq èh ma ùh loq.

²⁷ Aih iq raq, bàu au anoe ka pì ta clam, drah anoe qnoh ta qngah, bàu pì tàng gít ajang don, drah yǒng ta kù a po hnim hu anoe qnoh.

²⁸ Ùh dùh yùq dèh ka mangai jah jêh toq chac pì mahaq ùh jah jêh mahua yiang pì; ma khòh yùq aih Mangai jah broq hnhung xam mahua xam chac pì oe ta hwình ùnh.

²⁹ Baiq toq chim prùch ùh xài wì hmaq tech moeq jèn bac raq qmòh? Mahaq tàng joq ùh xài tiaq manoh Baq pì, qnhòq lah i mòeq toq chim leq ma taclìh ta haqneq.

³⁰ Xàc ta gàu pì qmat hadai rènh khoe dìq.

³¹ Qmang aih, apaq yùq cleq, pì yeo canaq ùh hnau ka chìm prùch.

³² Aih iq raq, cabô ràu trùh au enh ngèa ka phù cròng, au hanoh ràu trùh haq enh ngèa ka Baq au oe ta plình;

³³ Cabô hangah đac au enh ngèa phù cròng, au hadai hangah đac haq enh ngèa ka Baq au oe ta plình.

³⁴ Apaq xoh au trùh ðòeq aràng kan catèm ta cròng taneh, au trùh ùh xài ðòeq aràng kan catèm, mahaq aràng chang aràng jaoq.

³⁵ Au trùh ðòeq lah kon calô khoe ka baq haq,

lah kon cadri khoe ka miq haq, lah kon mai khoe ka yaq haq;

³⁶ qmang aih, mangai oe ta hnim pì raq, ma tablêq hlài ka pì.

³⁷ Cabô loq waq dèh ka miq baq ùh hnau ka au, mangai aih ùh tajì òòeq hu tiaq au, cabô loq waq dèh ka kon calô kon cadri ùh hnau ka au, mangai aih hadai ùh tajì ka tiaq au,

³⁸ Cabô ùh xùi dèh long pagat òòeq tiaq au, mangai aih hanoh ùh tajì ka tiaq au.

³⁹ Cabô àu wèq dèh toq kan rìh dèh cla, haq aih èh jah hnhung, mahaq cabô chiùq cađac dèh kan rìh òòeq hu tiaq au, aih èh jah chaq hnoq hlài dèh.

⁴⁰ Cabô òòeq pì, haq aih òòeq au, cabô òòeq au, haq aih òòeq Mangai ma khoe thê au.

⁴¹ Cabô òòeq mòi ngai pajàu taiq mangai aih broq pajàu, haq aih jah kan baha da mangai pajàu, cabô òòeq mòi ngai taq atoq, taiq mangai taq atoq, aih èh haq aih jah kan baha ka mangai ta atoq.

⁴² Cabô chiùq am ka mòi ngai kon qyoh taqne bài kon qyoh kô, ôq mòi chrông diac hangeo, taiq mangai qyoh aih broq mangai tiaq hóc au, joq qnàng au doe ka pì, kan baha da haq aih èh ùh jò leq hnhung.

11

¹ Khoe ka hnài dèh mòi jàt baiq ngai tiaq hóc, Chuaq Jesus loh enh aih, lam hnài roc plài oe gùng Galili.

Mangai tiaq hóc Jon baptit

² Jò Jon oe ta hnem tù, tàng wì anoe bài yiniq Chuaq Jesus Christ ma broq, haq thê dèh mangai tiaq hóc haq trùh ti Chuaq Jesus,

³ wì bóch: Ìh kô raq ùh xài Mangai ma hu trùh tacô, nhèn ahiaq oe raq ep gòm mangai qnoeq ùh?

⁴ Chuaq Jesus padreo bàu: “Drah hlài beq, taqmon hlài ka Jon loq rìm yiniq pì ma khoe tàng, khoe hnoq:

⁵ Mangai ùh xau jah hnoq, mangai liap jah lam, mangai bacùn jah hreo, mangai cìc don jah tàng, mangai cachit jah rih hlài, mangai nanxa jah tamàng bàu lem.

⁶ Xôq ramot am ka mangai leq ùh hiaq catoeh ka au.

⁷ Jò wì aih khoe hlài, Chuaq Jesus men anoe trùh Jon dôq wì phù cròng ma tiaq haq loq: “Pì khoe lam ngan cleq tanòe hawit? Ajoq pì lam ngan long triang niaq cayeo hlui ùh xài?

⁸ Pì lam ngan cleq hòm? Pì lam ngan mangai caxùnh atàc eo lem ùh xài? Hatau! wì mangai ma caxùnh eo ranhòm oe ta hnim bùa.

⁹ Pì lam ngan cleq hòm? Ajoq lam ngan mangai tapoch pajàu ùh xài? Joq, au doe ka pì, ùh hnau ka tapoch pajàu hòm.

¹⁰ Aih raq mangai ma khoe i bàu achìh trùh haq: “Au thê dèh mangai lam adroe ka Kon, Đòeq chôn timer trong Kon lam.”

¹¹ Joq qnàng au doe ka pì, òiq dồng taqne bài mangai ha-uang loh enh gucadrì, ùh i cabô yeo haq nhèq ùh hnau ka Jon Baptit, mahaq yac ka mangai òiq jaq hamoq oe tanòe diac plình, dua yeo haq nhèq ùh hnau ka haq.

12 Mahaq, patep enh hì da Jon Baptit trùh manòeq, diac plình glàm kan khech tət, mangai khech tət aih blah yóc diac plình.

13 Majah qmang aih, òiq dǝng ka bài bàu pajàu hloe xam hset ranenh ma khoe achìh trùh pang qnhòng da Jon raq.

14 Tàng pì enh waq ka loq, haq aih raq Êli, mangai ma ep trùh.

15 Cabô i don òòeq tamàng, tamàng beq!"

16 Au aliah nang noe kô ti cabô kô èh? Nang noe kô bu dàng kon qyoh ha qngui tanòe atech, creò dèh ka bua,

17 rameh: "Au khoe hlui taliaq ka pì, gleq pì ùh ti yòng cađòeq? Au khoe ti atoch, gleq pì ùh crò hmoe."

18 Jon trùh ùh acaq, ùh ôq, pì doe: Kiac khoe caqnit don haq.

19 Kon mangai trùh, haq acaq, haq ôq, aih pì doe: Meh mangai plai toq ka acaq ôq, taqmùt toq ka mangai yóc thèq xam bài mangai ùh wìa. Mahaq, kan rabiaq ma joq qnàng aih jah hnoq ajang nòe yiniq broq

20 Taiq bài wì ma oe tanòe plài gùng Chuaq Jesus khoe broq bàc trong halac, ùh lòm raxach, Chuaq Jesus tapoch ka wì gùng aih:

21 "Habo ka pì, plài Côrasin, habo ka pì plài Betsaida. Tàng joq bài kan halac khoe broq ta pì qmat aràng broq gùng Tyro, gùng Sidôn, baiq plài aih khoe yóc eo briang òòeq taqmàn rađeh, kui blo tanùh, raxach nèh haq raq.

22 Aih au doe ka pì, trùh hì hadrah, gùng Tyro, gùng Sidôn pòq kan hadrah yi biaq ka pì.

²³ Gè kô èh, Cabênaum, gùng ma khoe jah atóc haq nhèq trùh ta plình, kô èh jah caqnìh cađac trùh ta hwinh. Tàng joq bài kan halac ma khoe broq qne gè, aràng broq ka gùng Sôđôm, gùng aih oe raq trùh manòeq.

²⁴ Mahaq au doe trùh hì hadrah èh, gùng Sôđôm èh jah hadrah yeo biaq ka gè.

Bàu lem jah mahnu am ka kon qyoh

²⁵ Jò aih raq, Chuaq Jesus doe: “Baq! Ìh broq Craq oe taplình crống taneh, au manèh apôi Ìh, majah qmang aih Ìh khoe cadoc bài yiniq kô ka bài mangai rabiaq, mangai loq, mahaq Ìh patô am ka kon qyoh jah loq.

²⁶ Baq ôi, joq qmang aih raq, majah qmang aih Ìh khoe hnoq biac aih lem.

²⁷ Rìm yiniq Baq khoe jao dǒng ka au, enh gùng ka Baq ùh i mangai leq canau ka Kon, enh gùng ka Kon ùh i mangai leq loq ka Baq.

²⁸ Dìq dǒng ka mangai tagah lep, pòq trap, drah trùh ta au beq, au jah am ka pì padài.

²⁹ Au i manoh khun alàng loq hamuan rađeh, drah taqmac wê long ech au, hóc tiaq au, aih èh mahua yiang pì jah padài.

³⁰ Majah qmang aih long ech da au kô hlàu, tanòng da au kô hêu.

12

Prot acaq hadròc qmau

¹ Jò aih, wop hì sabat, Jesus pùh pagat òng ruàng, bài mangai tiaq hóc pangot wì haq git kaq hadròc qmau.

² Mangai Pharisi hnoq qmang aih, wì lam doe ka Chuaq Jesus: Ngan meh, bài mangai tiaq hóc ìh, broq trong ùh lòh ta hì Sabat.

³ Mahaq Chuaq Jeus padreo bàu ka wì aih: “Ha bùa Đawit xam mangai lam tiaq haq khoe broq jò wì haq pangot, pì qnhòq hmaq đóc qmòh?

⁴ Aih ìq, bùa mùt ta hnim Boc Plình, yóc acaq bēnh dēch ka Boc Plình, bēnh aih bùa xam mangai lam tiaq haq ùh khòh kaq, bēnh aih đòeq toq ka bài pajàu.

⁵ Hìaq pì ùh i ngan ta hset ranen, trùh hì sabat, bài pajàu oe ta hnim kùh waiq, broq ùh troq tiaq ranen hì aih aleq i tuiq cleq?

⁶ Au doe ka pì, ajang kô i mœq ngai yeo kàn ùh hnau ka hnem kùh waiq.

⁷ Tàng pì loq bàu kô anœ cleq: “Au tangēh ka manoh loq waq, ùh i ngēh trùh ramēnh tadreo, qmang aih pì khoe ùh hìaq capoch hăbô đac ka bài mangai ùh i đēh yiniq lui cleq.

⁸ Majah qmang aih Kon mangai aih craq hì sabat”.

⁹ Lam khoe ka aih, Chuaq Jesus mùt tanœ hnim tagop qyoh.

¹⁰ Ta aih i mœq ngai, angwenh mœq pah tì. I mangai bôch Chuaq Jesus: Hì Sabat akhòh broq brēh ka mangai yiniq ùh? Majoq qnàng aih wì qnang chaq nen đòeq hu tah hadrah ka haq.

¹¹ Chuaq Jesus tapoch ka wì: “Taqne pì qmat i ka mangai leq i mœq toq kon trùu, tàng hì Sabat haq taclìh ta ralôc, pì ma ùh dēch atôc haq?

¹² Mangai ma ùh yeo kàn ùh hnau ka trùu! Qmang aih hì sabat khòh broq trong lem.

13 Khoe aih, Chuaq Jesus doe ka mangai ngwenh tì: “Hnhu tì qmat” Haq aih qnhu dèh tì, tajõe qmòe tì pah kô lem hlài tiah ka tì pah tau.

14 Bải mangai Pharisi loh enh gùng, hatình ka dabau chaq trong hu jêh cađac Jesus.

15 Chuaq Jesus loq qmang aih, haq lam đac taqnoeq, i bacc ngai tiaq haq, haq broq ãiđ đồng ka wì jah brêh.

16 Chuaq Jesus ùh lòh wì anoe am ka cabô loq ka haq.

17 Dôq xit qmang ka bàu pajàu Êsai khoe anoe:

18 “Kô, hapõng Au ma khoe rài, Mangai Au ma ãiđ jaq loq waq, lem manoh au rìm trong.

Au am Yiang Hadròeh au oe ti haq,

Haq aih èh ma anoe qnoh bàu taq atoq am ka rìm ãiac.

19 Haq ùh tarahen, ùh dèh bàu,

Ùh i cabô tàng bàu haq oe ti trong

20 Haq ùh plêh đac triâng niaq khoe tagoh, ùh hlui đac ãen khoe ten pat.

Trùh jò Haq broq ka kan taq atoq jah blêq.

21 Rìm ãiac tangèh ãiđ anòe yiniq Haq.”

Jesus broq brêh ka mangai kiác rùp

22 Jò aih i mangai aràng ka Chuaq Jesus mòeq ngai kiác caqnit don, ùh xau hnoq rái làu, Chuaq Jesus broq brêh ka haq aih loh ka jah tapoch jah hnoq.

23 Wì hamàih ãeh hra, wì bòch dabau: Haq qmat ajoq kon xau bùa Đawit?

²⁴ Mahaq bài mangai Pharisi hìa qmang aih wì doe: Haq qmat canòm ka Bênsêbun craq kan kiac òòeq drùh kiac.

²⁵ Chuaq Jesus loq ka manoh wì, haq doe: “Moeq diac tàng joq cla haq hit lah raðeh, diac aih èh ùh khoe ka raliang, mòeq plài, mòeq hnim tàng hit lah dabau aih èh pì oe dràng yòng.

²⁶ Tàng joq Satan hnan Satan, aih ajoq haq hit lah raðeh, aih èh diac haq yòng qmang leq ma oe keo?

²⁷ Tàng au canòm ka Bênsêbun òòeq hnan kan kiac, ha wì kon pì qmat èh canòm ka cabô òòeq drùh hnan kan kiac? Qmang aih, wì haq aih èh ma broq mangai hu hadrah bài pì.

²⁸ Tàng joq au canòm ka Yiang Hadròeh enh Boc Plình òòeq drùh hnan kan kiac, aih diac Plình khoe trùh ta pì.

²⁹ Qnah hòim, i ka cabô jah mùt ta hnim mangai dêh padren hu tablah yóc da haq aih kùng hang, ma baxèm aih ùh kàt cla haq adroe oèq? Ep kàt cla haq adroe khoe èh men jah blah yóc hang ta hnim haq.

³⁰ Cabô ùh oe ti au, haq aih mangai tablêq ka au, cabô ùh taqmùt ti au, wì aih prah priang dõng.

³¹ Qmang aih au doe ka pì, rìm yiniq lui pì xam bàu tapoch qmèq ka Boc plình, òòeq dõng èh oe jah paclaih, mahaq bàu tapoch troq trùh Yiang Hadròeh ùh jò leq jah paclaih.

³² Tàng cabô capoch tablêq ka Kon mangai, èh oe jah paclaih, mahaq cabô tapoch bàu tablêq Yiang Hadròeh, yac ka qnhòng kô trùh qnhòng atiq èh yiniq lui aih dua ùh jah caqnaih.

³³ Long lem èh loh plì lem, long qmèq plì hadai qmèq, ngan plì ma loq ka long.

³⁴ Wùih! Bàì adrech bìh plǒng meh, pì qmat nang noe qmèq, broq qmang leq ma hloh bàù lem? Ta cliac khoe bình, men hloh bàù tapoch a hacùng.

³⁵ Mangai lem ta dalam haq bình kan lem men jah tapoch hloh bàù lem, mangai dù ta haq bình kan dù majah tapoch hloh bàù dù.

³⁶ Au doe ka pì, trùh ta hì hadrah, rìm ngai ep anoe qnoh dǒng dèh bàù raḏeh ma khoe tapoch.

³⁷ Majah qmang aih, ajang nòe bàù capoch aih raq, ma hì jah creo ka ìh mangai taq atōq, hadai ajang bàù tapoch aih raq ìh ep pòq kan baxa.

Jesus ùh broq can halac

³⁸ Khoe aih i bàì mangai hnài ranenh xam bàì mangai Pharisi doe ka Chuaq Jesus: Mangai hnài, nhèn enh hnoq ìh broq trong halac.

³⁹ Chuaq Jesus padreo bàù: “bàì caxi noe dù, loq tango kô, bòch ngan kan halac, ùh i kan halac leq am ka pì hnoq enh gùng ka kan halac troeq pajàu Jôna.

⁴⁰ Majah qmang aih Jôna khoe oe ta cliac ka kàn piq hì piq mang, hanoh qmang aih èh, Kon mangai hadai piq hì piq mang oe ta taneh.

⁴¹ Trùh hì hadrah, wì ma oe ta Ninive aih èh ma yòng hu hadrah ka caxi noe kô, ma jah qmang aih wì haq tàng bàù pajàu Jôna hnài aih wì khoe raxach, mahaq ajang nòe kô, i mòeq ngai yeo haqnèq ùh hnau ka Jôna!

⁴² Trùh hì hadarah, bùa Cadri enh ðè mahì tǒc èh ma yòng hu hadrah ka nang noe kô, majah

qmang aih bùa aih khoe trùh enh nòe hangai
 òòeq hu tamàng bàu rabiaq enh nòe bùa Salômôn,
 mahaq anòe kô i mòeq ngai yeo haqnhèq ùh hnau
 ka bùa Salômôn!

⁴³ Jò kan kiac khoe loh enh moeq ngai, haq lam
 tanòe croh crènh chaq nòe padài, mahaq chaq ùh
 jah,

⁴⁴ èh haq hi doe: Au wìh hlài ta hnim au ma neo
 loh, jò haq hlài, hnoq hnem dech do, khwit khoe
 lem, khoe palauq qmòe ka alàng.

⁴⁵ Haq lam hòm, ahlài tam tapèh toq kiac qnoeq
 yeo dù ùh hnau ka haq, hlài oe pajùm ta hnim aih,
 mangai aih atiq èh yeo hamoq ùh hnau ka adroe
 hòm. Bại caxi noe dù kô qmang aih èh diq.

Miq xam bài oh Jesus

⁴⁶ Jò Chuaq Jesus oe raq tapoch ka bài wì, miq
 haq xam bài oh haq yòng enh gùng, enh capoch
 ka haq,

⁴⁷ I mangai trùh doe ka Chuaq Jesus: Miq ìh
 xam bài oh ìh yòng enh gùng, enh tapoch ka ìh

⁴⁸ Haq padreo bàu: “Cabô miq au, cabô oh au?”

⁴⁹ Haq patô dèh bài mangai tiaq hóc rai doe:
 “Hacô miq au xam bài oh daq au!”

⁵⁰ Majah qmang aih, mangai leq broq tiaq
 manoh Baq au oe ta plình, aih raq oh daq calô,
 oh daq cadrì xam miq au.

13

Àliah trùh mangai rai adrech

¹ Hadai hì aih, Chuaq Jesus loh enh hnim lam
 hangui ta kênh diac raxiq,

² Wì phù cròng tagop ti dabau haraya dudan ka Haq, Chuaq Jesus ep loh hangui ta boang, diq ka wì qnoeq oe ta go.

³ Chuaq Jesus yǒc bàc trong aliah hu hnài wì, Haq doe: "I moeq ngai lam rai adrech.

⁴ Jò haq rai adrech, i qnah ta cìh ti trong lam, chìm loh jòh dǒng.

⁵ Moeq qnah taclìh tanòe raga, taneh toq biao, catùh ùh jrùq, rênh plòh.

⁶ Mahaq jò mat mahì yòng sreo, ùh i ka riah hi loh ka croh.

⁷ Mòeq qnah taclìh nòe xem yila, yila rai èh ray cràm bahlac haq jôq ta aih.

⁸ Mòeq qnah qnoeq hòh, cìh troq tanòe taneh lem, hi loh plì, mòeq pliang loh jah moeq hrinh, mòeq pliang jah tadràu jàt, mòeq jah piq jàt.

⁹ Cabô i don, tamàng beq!

¹⁰ Mangai tiaq hǒc, thia ka haten bòch Chuaq Jesus: Gleg ìh ma jah yǒc bàu aliah qmang aih òòeq tapoch ka wì?

¹¹ Chuaq Jesus padreo bàu: "Majah qmang aih kan hlèp da diac plình khoe am ka pì loq, mahaq bàì wì tau aih ùh dǒq ka wì haq loq."

¹² Majah qmang aih mangai leq ma khoe i aih jah am tam, aih èh wì hi i rah ùh diq ùh dài, mahaq mangai leq ma ùh i, aih èh doeh yǒc hloe yiniq haq ma khoe i.

¹³ Aih ìq au ma jah toq aliàh ka wì haq, yac ka wì haq ngan dua ùh xau hnoq, hadràng don mahaq ùh tàng, tamàng mahaq ùh qnì cleq.

¹⁴ Qmang aih khoe xit ka bàu pajàu Êsai jò haq ràu trùh wì qmat:

Pì hadràng don tamàng, mahaq ùh qnì cleq;
Haqmiang ngan mahaq ùh xau hnoq.

¹⁵ Majah qmang aih, manoh wì haq khoe cadoq;
Don wì haq khoe trap, mat wì haq khoe tajip,
Yùq dèh mat loq xau hnoq, don rađeh loq jah
tàng,

Manoh da đeh loq jah loq, rađeh loq wìh hlài,
Èh au loq broq wì haq jah brêh qmòh.

¹⁶ Mahaq xôq ramot am ka bài pì mat jah hnoq,
xôq ramot am bài pì, don ma jah tàng.

¹⁷ Joq qnàng au doe ka pì, i bàc mangai pajàu,
bàc ngai taq atoq khoe ngèh ka jah hnoq trong pì
hnoq, mahaq ùh jah hnoq, ngèh ka jah tàng trong
pì ma jah tàng, mahaq ùh jah.

¹⁸ Pì tamàng bàu aliah mangai lam rai adrech
aih anoe cleq.

¹⁹ Jò mangai leq tàng bàu lem diac plình, mahaq
ùh lòm qnì qmòe cleq, aih kiac dù trùh ta qmiaq
yôc yiniq ma khoe jah rai ta manoh haq, aih la
mangai majah adrech cìh ti trong lam.

²⁰ Mangai jah adrech cìh nòe taneh raga aih
mangai bu tàng bàu, khoe lem bùi drah yôc huiq.

²¹ Mahaq ta manoh ùh i ka riah, rìh moeq hyàc
raq, trùh jò glàm nanxa, khech tàt, hi tacro.

²² Mangai jah adrech cìh nòe xèm yila, aih
mangai tàng bàu, mahaq manoh hèm toq ka
qnhòng kô, ònh toq trong padròng kan, broq ka
bàu aih ùh plôh ramot, hi loh ka ùh sròc.

²³ Mahaq, mangai ma jah adrech cìh tanòe
taneh lem, aih mangai loq tàng, haq aih jah loh
pli, moeq pliang jah qmòe moeq hrinh, pliang
qnoeq jah tadràu jàt, ma qnoeq jah piq jàt.

24 Chuaq Jesus aliah trong qnoeq hòm ka wì haq: “Diac plình tiah ka mangai yốc adrech lem loh rai dèh ta ruàng.

25 Mahaq jò diq ka wì oe raq kùì, mangai tagit ka haq loh rai adrech nhat adròn h ta qmau aih, khoe aih hi lam đac.

26 Trùh jò qmau aih yòng kàn, loh hadròc, adròn h hadai ploah loh diq.”

27 Bài mangai patìh lam anoe ka wì craq ruàng aih: Wì craq, ma ùh xài ìh rai toq adrech lem ta ruàng ìh qmòh? ha nhat adròn h qmat loh enh leq?

28 Wì craq padreo bàu: Aih mangai tagit ka au ma broq. Bài hapống doe: Ìh alòh bài nhèn loh bùiq nhat aih loq ùh?

29 Wì craq padreo bàu: Hêq ùh dùh, yùq jò bùiq pì loq troq bùiq ataq qmau.

30 Dòq haq diq baiq wa yòng hloe trùh jò gat, trùh jò gat i au tanap ka bài bình gat qmau rameh: “Adroe aih, pì bùiq nhat adròn h òeq, cadop tang cadop hu bùh đac, qmau aih pì don đòeq da au ta hapom”.

31 Chuaq Jesus yốc trong qnoeq hòm hu aliah tam ka wì: “Diac plình tiah adrech habài wì ma rai ta ruàng.

32 Adrech joq yi yêq dống ka bài adrech qnoeq, mahaq jò hi jah honh, haq yeo kàn ka bài cachiq qnoeq, wìa qmòe long, jaq chìm mech lam broq pù ta hamen h haq”.

33 Chuaq Jesus patìah hòm ka wì: “Diac plình tiah ka blo alac, mangai cadrì ma yốc tah ta piq cadap dác, hi trùh dèh jò dác aih hi rêu dống.”

34 Chuaq Jesus capoch ka wì phù cròng ma tiaq

Haq toq xam bàu aliah, ùh i tapoch cleq haq ma ùh aliah ka wì.

³⁵ Waq ka xit troeq bàu pajàu ma khoe anoe:

“Au dahah bàu òòeq tapoch aliah.

Au hu paqnoh bài kan hlèp, patep enh jò broq plình crông taneh.”

³⁶ Jò khoe am wì hlài, Chuaq Jesus wìh mùt ta hnim, bài mangai tiaq hóc trùh ka haten bòch haq: Ìh anoe am ka nhèn loq bàu ìh ma aliah adrech nhat adròn òe ta ruàng aih qmang leq.

³⁷ Jesus padreo bàu: “Mangai rai adrech lem aih Kon mangai.

³⁸ Ruàng aih crông taneh kô, adrech lem aih kon diac plình, nhat adròn aih kon kiac dù,

³⁹ mangai tagit rai adrech nhat, aih kan kiac dù, hì gat qmau aih hì pulùch da crông taneh kô, bình gat qmau aih bình plình.

⁴⁰ Tìah ka wì bùiq nhat adròn bùh ta ùnh qmang leq, hì crông taneh kô òiq lùch qmang aih èh òiq.

⁴¹ Kon mangai hì thê dèh bình plình hacom qnoh òng bài mangai ma broq dua qmèq xam mangai broq dù loh khoe ka diac Haq.

⁴² Khwênh caqnìh wì aih tanòe hlông ùnh, ta aih èh i toq kan crò hmoe rai cadrit hanenh.

⁴³ Jò aih, bài mangai taq atoq ca-ah tìah ka qngah mahì òe tanòe diac Baq wì haq. Cabô i don, drah tamàng.

⁴⁴ Diac plình tìah ka hang canaq catùh òòeq ta ruàng, i moeq ngai chaq hnoq, haq hì cadoc òòeq rai hlài rai lem bùi, tech òiq òng dèh kùng hang, òòeq hu rot ruàng aih.

⁴⁵ Diac plình hadai tìah ka mangai lam padro, chaq ngốc canaq.

⁴⁶ Jò chaq khoe hnoq ngốc canaq, haq tech đồng dèh kùng hang ðoeq rot pliang ngốc aih.

⁴⁷ Diac plình hanoh tìah ka hlàm ma tang ta hlõng, hlech rìm yiniq ka.

⁴⁸ Jò khoe bình ka tanang hlàm, mangai tang hi dèch hlàm atõc tago, khoe aih hangui ràih ma lem ðoeq crài, èh tah ta tabõng, mahaq khwênh cađac đồng bài ma ùh wìa.

⁴⁹ Trùh hì crõng taneh kô lùch, hanoh qmang aih diq: Jò aih, bài bình plình trùh ðoeq lah bài mangai dù loh khoe ka mangai taq toq.

⁵⁰ Khwênh caqnih bài mangai broq dù ta tanùh ùnh, oe nòe aih i kan hmoe rai cadrit hanenh.

⁵¹ Pì atem bài bầu aih? Bài mangai tiaq hõc doe: Nhèn loq tàng.

⁵² Chuaq Jesus hi doe: “Dài qmang aih rìm ngai hnài ranenh, jò wì haq khoe hõc loq rìm trong tanòe diac plình, hi tìah ka wì craq hnìm qnoh đồng dèh bài hang neo xam hang dùnh loh enh gùng ka hapom.

Chuaq Jesus hlài ta Naxaret

⁵³ Jò Chuaq Jesus khoe hêq ka capoch bài bầu aliah aih, haq hi lam taqnoeq.

⁵⁴ Haq hlài dèh gùng cla, mùt hnài tanòe hnìm tagop qyoh, wì hamàih ðeh hra ka bầu haq, wì bõch dabau: Mangai qmat haq jah enh leq bài kan rabiaq xam kan halac qmang meh?

⁵⁵ Haq qmat ma ùh xài kon mangai thòq broq long chàm qmòh? Miq haq ajoq Mari? Bài oh daq haq ajoq Jaco, Jôsep, Simôn, Jiu ðe?

⁵⁶ Bàì oh cadri haq ma ùh joq oe taqne bèn kô? Enh leq haq majah bàì yiniq qmang meh?

⁵⁷ wì aih hi catoeh ka haq. Mahaq Chuaq Jesus doe ka wì: "Toq gùng cla, hnem cla raq ma hnoq mangai pajàu ùh loh cleq."

⁵⁸ Ta aih Chuaq Jesus ùh broq bàc kan halac, ma jah qmang aih ta aih wì ùh i ka manoh lùì.

14

Bùa Herôt jêh đac Jon Baptit

¹ Jò aih Hêrot (aih bùa yi enh qneq), hìa bàu wì anoe trùh Chuaq Jesus.

² Haq doe dèh ka bàì mangai ma tiaq ka jènh ka tì ti haq: Kô raq Jon Baptit, mangai cachit rìh hlài men jah broq trong halac qmang aih.

³ Aih iq rameh: Taiq Hêrôdia, aih mai da Philip, oh cla haq, dài Hêrôt majah rùp clêh Jon Baptit.

⁴ Majah qmang aih, Jon i tagàih ka bùa rameh: Bùa ùh jah yóc mangai cadri qmat broq mai.

⁵ Bùa enh jêh đac Jon, mahaq haq ùh hùa ka wì phù cròng, majah qmang aih phù cròng òiq doe Jon aih mangai pajàu kàn.

⁶ Wop hì acaq yiniang manè hì ha-uang ka bùa Hêrôt, kon cadri da Hêrôdia muaq taqne bàì mangai trùh acaq yiniang, òiq jaq troq ka manoh bùa.

⁷ Jaq bùa mech chiùq hapah jò ma tèu bàu am ka kon cadri aih, waq toq kon mangai aih bòch cleq dua haq am.

⁸ Jao miq haq patùt, kon cadri aih hi bòch bùa: Ìh yóc gàu Jon Baptit tah ta dòt kàn hu am ka au.

⁹ Bùa mangò ta manoh, yàng haq khoe troq hapah, qnah hò m i bài mangai ma hangui acaq yiniang oe ta aih, bùa hi dōq kon cadrì aih jah troeq bàu haq bòch.

¹⁰ Bùa hi thê wì lam jêh Jon tanòe hnim clêh.

¹¹ Khoe aih wì yōc gàu haq tah ta dōt kàn qnoh am ka kon cadrì aih, haq aih hi aràng dèh ka miq.

¹² Atiq ka aih, mangai tiaq hōc Jon, lam yōc hanang haq ahlài catùh.

Jesus broq bēnh yàng baxèm

¹³ Chuaq Jesus hìa qmang aih, haq tōc ta boang wia taqnoeq, haq lam tanòe ma hawit. Yàng jò wì phù cròng ma hi loq, wì loh enh bəc plài, wì lam jènh hu tiaq Haq.

¹⁴ Chuaq Jesus bu tōc enh boang, hnoq bài mangai bəc haraya harayùc, manoh haq tamèt ka wì, haq broq brêh ka wì ma yiniq.

¹⁵ Trùh jò mat mahì khoe haqneq, bài mangai tiaq hōc, thia doe ka Haq: Tanòe kō hawit, èh trōc hadai khoe ten clam, Ìh am wì hlài beq, dōq wì mùt roc plài chaq rot dahwèq acaq.

¹⁶ Chuaq Jesus doe: “Wì ùh i ep lam, pì qmat raq mangai ma ep am ka wì acaq.

¹⁷ Mangai tiaq hōc doe: Tacō nhèn i padam toq bēnh xam baiq pliang ka raq.

¹⁸ Chuaq Jesus doe “Aràng ka au tacō.

¹⁹ Chuaq Jesus thê wì hangui ta nhat, khoe aih, yōc padam toq bēnh xam baiq pliang ka, Haq qngoc ta plình rai manè apôi, khoe èh goh bēnh aih am ka bài mangai tiaq hōc, mangai tiaq hōc ti aràng ka bài wì.

20 Mangai leq mangai meh panàc ðeh hra, rah ðênh ti toch hlài bình jah moeq jàt baiq talênh.

21 Wì ma acaq ta aih jah qnah ta padam muàn mangai, ùh rênh wì gucadrì xam kon qyoh.

Jesus lam ti riang diac

22 Khoe aih Chuaq Jesus drah bahôiq ðài mangai tiaq hóc loh ta boang chôn timer pah tau, jò aih haq oe tago hu ti am wì mangai bác hlài ta hnem.

23 Atiq ka haq khoe am wì hlài, haq tóc ta wang moeq ngai ðoeq hu waiq khàn.

24 Jò aih, boang loh khoe trùh taqne diac raxiq, glàm cayeo tât qngia, i diac lai laq tep ta boang.

25 Mahaq trùh jò pôn ta mang aih, Chuaq Jesus lam jên timer ti riang diac ðoeq trùh ti ðài mangai tiaq hóc.

26 Jò wì hnoq haq lam ti riang diac, ðài mangai tiaq hóc yùq crè wì doe: Tau raq kiac chóc, khoe aih wì yùq pì cajaq wì breo wên timer ðênh.

27 Mahaq Chuaq Jesus drah creo ka wì haq: "Pì catêm beq hacô au, apaq yùq!"

28 Phiero doe: Craq au! tàng joq Ìh, Ìh ðôq au jah lam ti riang diac hu trùh ta Ìh.

29 Chuaq Jesus doe: "Lam ta kô" Phiero cadiang loh enh boang, lam ti riang diac ðoeq thia ta Chuaq Jesus.

30 Yàng jò haq hnoq cayeo hlui, haq loh yùq crè, haq hi hlòp ta diac, haq drah breo cadêh: Craq au, ðêch au diq.

31 Tajòe qmòe Chuaq Jesus hn timer ti cadop ti haq, rai doe: "Wùih! mangai biaq hrình manoh lùì, hagleq ìh ma toq ùh tùt qmang qmat."

³² Jò Chuaq Jesus xam Phiero khoe tồc ta boang, cayeo hi hatinh.

³³ Bài wì ma oe ta boang trùh kùn cràng enh ngèa ka Chuaq Jesus rai doe: Ìh kô joq qnàng Kon calô Boc plình.

³⁴ Jò khoe catech pah tau diac, Chuaq Jesus xam mangai tiaq hốc lam ta gùng Gênesaret.

³⁵ Wì gùng aih canau ka haq, drah thê mangai lam bahia jàp jà ka bài gùng du danh ta aih, wì tông qnàng bài mangai yiniq trùh ka haq.

³⁶ Rai bôch Chuaq Jesus am ka bài mangai yiniq jah bèq ðeh toq haqmai eo haq, qmang aih waq toq cabô hi bèq eo haq, hi jah brêh ðong.

15

Qnheo tì adroe ka acaq

¹ Khoe aih, i bài mangai Pharisi xam bài mangai hnài ranenh trùh enh Jêrusalem hu bôch Chuaq Jesus

² Hagleq bài mangai tiaq hốc Ìh ùh wèq bàu wì craq ðinh nèh, wì haq ùh qnheo tì adroe ka acaq.

³ Chuaq Jesus padreo bàu: “Ha pì, hagleq pì majah tiaq ðeh bàu qmon loh qmòe ka cađac ranenh Boc Plình?”

⁴ Majah qmang aih Boc Plình i thê rameh: “Thê loq iu miq baq pì, èh bàu kô hòh: Mangai leq hnáp ðeh ka miq baq, haq aih ep cachit.

⁵ Yàng da pì aih doe: Cabô doe ðeh ka miq baq rameh: ðìq ðong bài yiniq cleq au jah patih ka miq baq, au khoe ðech ðong ka Boc Plình, haq aih pì hìaq ep iu ðeh miq baq hòh.

⁶ Qmang aih, pì tiaq dèh bàu cla qmon mahaq cađac bàu Boc Plình.

⁷ Pì qmat joq mangai toq ti patìah! Êsai tapoch pajàu khoe troq jò haq ràu trùh pì rameh:

⁸ “Wì kô yóc toq hacùng bàu kùh waiq au;

Yàng manoh cliac wì haq hangai ka au raya,

⁹ Bìac wì kùh waiq Au aih qngwan,
Majah qmang aih wì haq hnài tiaq toq ranenh loh
enh kon mangai.”

¹⁰ Khoe aih Chuaq Jesus creó ka òai wì mangai bàc ta aih, haq doe: “Thê pì tamàng rai loq tàng.

¹¹ Ûh xài yiniq cleq mùt ta hacùng ma broq ka pì loh ka amùà, mahaq yiniq cleq loh enh bàu pì aih ma broq ka pì loh ka amùà”!

¹² Bài mangai tiaq hóc thia haten ka Jesus wì bòch: Ìh aloq bài mangai Pharisi tàng bàu ìh wì haq nòeh ka ìh.

¹³ Chuaq Jesus padreo bàu: Long leq Baq ta plình ma ùh i pìt, ep bùiq cađac

¹⁴ Dôq haq: Aih raq bài mangai ùh xau broq mangai qnung trong, tàng joq mangai ùh xau qnung mangai ùh xau, òiq baiq ka wa clih ta ralóc.

¹⁵ Phiero hi doe: Ìh anoe am ka nhèn loq ðeh bàu aliah aih òiq.

¹⁶ Chuaq Jesus bòch: “Pì ùh tem bàu aih qmòh?

¹⁷ Pì qnhòq qnì cleq ma mùt ta hacùng aih èh haq hi loh hloe tacliac, khoe aih ma ùh xài lam cađac tanòe hlèp qmòh?

¹⁸ Yàng bài yiniq cleq ma loh enh hacùng, aih òiq loh enh manoh cliac, bài yiniq aih ma broq ka pì loh ka amùà.

19 Majah qmang aih enh manoh cliac ma loh òai kan dù, jêh đac mangai, tanqnong, loq tango, atùng, tapoch qmùt, tapoch hwang.

20 Bòi yiniq aih ma broq amùà ka pì, mahaq acaq ùh i qnheo tì ùh i broq ka pì amùà.

Mangai gucadrì Canaan

21 Loh enh aih Chuaq Jesus mùt ta gùng Tyro xam gùng Sidôn,

22 I mòeq ngai gucadrì Cana-an oe gùng aih trùh ta Chuaq Jesus, haq creo ka Chuaq Jesus: Wì Craq! Kon bùa Đavit, ha-och ka au diq, kon cadrì au kiac pawè yôt haq, joq hamoq đeh hrinh.

23 Mahaq Chuaq Jesus ùh tapoch moeq nà bàu. Mangai tiaq hóc lam haten, cali calo ka Chuaq Jesus: Ìh thê đồng haq qmat hlài beq, ngan haq toq creo dang enh rù ka bèn meh!

24 Chuaq Jesus padeo bàu: “Au ma jah trùh tacô, aih òeq hu chaq toq bài kon trùu Isorali ma khoe lam hwang.”

25 Mahaq mangai gucadrì aih thia qmòe ka haten, kùh waiq Chuaq Jesus, haq doe: Wì Craq, ha-och ka au diq.

26 Chuaq Jesus padreo bàu: Ùh dùh yóc bênh kon acaq òeq caqnìh ka koq.

27 Mangai gucadrì aih doe: Joq qmang aih Wì craq, mahaq bài kon koq tì kaq đeh bài hanech bênh ma taclìh enh pra wì craq.

28 Chuaq Jesus hi doe: “Mangai gucadrì meh! Ìh i manoh lùì kàn, yiniq aih èh ep loh tiàh ka manoh ìh ma enh.” Wop jò aih raq kon cadrì haq jah brêh.

Chuaq Jesus qmì pôn muàn mangai acaq

29 Enh aih Chuaq Jesus lam tiaq haqmai diac raxìq Galili, èh Haq hi tǒc hangui tawang,

30 Jò aih i mangai pi ka jaq trùh ti haq, qnung bài mangai cwê, lua mat, lâu, mangai ngwênh xam bàc ngai yinìq, òòeq wì aih ti jènh Chuaq Jesus. Chuaq Jesus broq ka wì aih jah brêh òìq òòng.

31 Aih, wì hnoq mangai lâu hloh tapoch, bài mangai ngwênh jah brêh, mangai liap jah cadiang lam, mangai ùh xau khoe jah qngah, wì hamàih òìq jaq, òìq ka wì manè apôì Boc Plình da Isorali.

32 Chuaq Jesus creò dèh ka mangai tiaq hǒc trùh ajang raðeh, haq doe: “Au ha-och ka wì kô, khoe piq hi wì haq oe ti au, manòeq kô pi i ka dahwèq hu acaq. Au ùh enh òòq wì haq hlài cliac dech, èh yùq wì haq loq hrah ti trong”.

33 Mangai tiaq hǒc doe: Oe tanòe ma hawit qmang kô, ma i hlàu cleq ka chaq dahwèq acaq òòeq ka mangai bàc qmang qmat jah acaq ka panàc?

34 Chuaq Jesus bòch mangai tiaq hǒc: “Pì i toq leq toq bèngh?” mangai tiaq hǒc doe: Tapèh toq bèngh xam toq bìaq pliang ka.

35 Chuaq Jesus thê bài wì mangai bàc hangui ta taneh.

36 Khoe aih, haq yǒc tapèh toq bèngh xam bìaq pliang ka, manè apôì, goh bèngh am ka mangai tiaq hǒc, wì aih ti aràng axong ka bài mangai bàc tau acaq.

37 Mangai leq mangai meh panàc òeh hra, rah haq wì ti toch bìngh tapèh talènh.

38 Mangai acaq jah pôn muàn mangai, ùh rènh gucadrì xam kon qyoh.

39 Khoe aih haq dôq wì hlài, èh haq hi loh taboang, òòeq hu tồc tagg Magađan.

16

¹ Bài mangai Pharisi xam mangai Sađusê trùh ti Chuaq Jesus òòeq qnhro haq, wì bòch Chuaq Jesus broq kan halac loh enh plình am ka wì haq hnoq.

² Mahaq Chuaq Jesus padreo bàu: “Jò trồc ten xèq, pì doe: Trồc kô èh lem, majah qmang aih trồc gòh.

³ Yàng di sroq, aih pì doe: Hì kô èh i cayeo dèh, majah qmang aih hì kô trồc clam ùh dai gòh. Pì loq hadro ngan trồc qmang leq, lai q pì ùh qnì hadro ngan jò!

⁴ Qnang noe ngang dù, tango anang kô bòch ngan moeq yiniq cleq ma halac, mahaq ùh i kan halac leq enh gùng kan halac da pajàu Jôna.” Khoe aih Chuaq Jesus hi wia lam ta qnoeq.

⁵ Jò bài mangai tiaq hỏc tồc khoe trùh pah tau diac, ùh hmàng wê bẻnh.

⁶ Chuaq Jesus doe ka wì haq: “Rabiaq haq, wèq rađeh khoe ka blo da bài mangai Pharisi xam mangai Sađusê.”

⁷ Mangai tiaq hỏc hẻm ta manoh rai hatuàng ti dabau: Kô jao bẻn ùh hmàng wê bẻnh.

⁸ Chuaq Jesus loq qmang aih, haq doe ka wì: Joq bài mangai bíaq manoh lủi, hagleq pì ma hẻm jao pì ùh i ka bẻnh?

⁹ Pì ma qnhòq loq, pì ma ùh hmàng padam toq bẻnh am ka padam muàn mangai acaq, rah haq pì toch bình jah toq leq rajo qmỏh?

¹⁰ Ji laiq pì ma ùh hmàng tapèh toq bèn̄h am ka pôn muàn mangai acaq, rah haq pì toch bìn̄h jah toq leq rajo?

¹¹ Pì ma ùh tem? Ùh xài au enh anoe trùh bèn̄h, mahaq pì ep ngan wèq rađeh khoe ka blo da mangai Pharisi xam mangai Sađusê.

¹² Pang aih, mangai tiaq hóc hi tem bàu Chuaq Jesus, haq ùh i anoe trùh blo broq bèn̄h, mahaq haq enh ràu trùh bàu mangai Pharisi xam mangai Sađusê ma hnài.

Phiero creo Chuaq Jêsus aih Christ

¹³ Jò Chuaq Jesus khoe mùt ta gùng Sêsarê Philip, haq bòch bài mangai tiaq hóc rameh: Tiaq bàu wì ma anoe aih, Kon mangai kô ìq cabô?

¹⁴ Mangai tiaq hóc têu bàu: Qnah ngai doe Ìh kô Jon Baptit, qnah ngai doe Jêrêmi, tàng ùh meh pajàu qnoeq.

¹⁵ Chuaq Jesus bòch: “Pì qmang leq? Pì doe au kô cabô.”

¹⁶ Simôn Phiero doe: Ìh kô raq Christ kon Boc Plình rìh halình.

¹⁷ Jò aih, Chuaq Jesus doe: “Simôn kon da Jôna, ìh qmat jah xôq ramot, mahnu kô ùh xài enh xech akia enh mahim am ka ìh loq, mahaq mahnu kô loh enh nòe Baq au oe ta plình.

¹⁸ Au hòm, au creo ka ìh: Ìh kô Phiero, kô èh au dèch paqnàng dèh Tagop Hadròeh enh crống hmo kô, bài qmang kan cachit ùh jò leq hlàt blêq haq.

¹⁹ Kô èh au am ka ìh gahlòng diac plình, waq toq yiniq cleq ìh clên̄h padràng oe ta crống taneh, yiniq aih hanoh clên̄h padràng ta diac plình, èh

hòm yiniq cleq ìh pèch caqnaih oe ta crõng taneh, yiniq aih hanoh pèch caqnaih oe ta diac plình."

²⁰ Khoe aih haq ùh lòh mangai tiaq hõc doe ka cabô loq ka rađeh aih Christ.

²¹ Pang aih, Chuaq Jesus men anoe ka magai tiaq hõc loq kô èh haq ep tõi ta Jêrusalem, ta aih haq ep chiũq bàc kan xalep enh tì kõiğ bài gucraq, bài pajàu kàn xam bài mangai hnài ranenh, ta aih èh wì jêh cađac haq ka cachit, trũh hì piq aih èh haq hì rìh hlài.

²² Phiero qnàng Chuaq Jesus lam takênh, haq tagàih: Ùh ðòh Craq au, Boc Plình ma manaq taleq, bài yiniq aih ùh i trũh ti Ìh.

²³ Chuaq Jesus wìh hlài rai tapoch ka Phiero: "Wia loh oe enh rù ka au! Satan, ìh qnang broq kan catoeh ka au, tagàu ìh ùh i hèm trũh trong ða Boc plình, mahaq hèm trũh toq trong ða kon mangai."

²⁴ Chuaq Jesus doe ka bài mangai tiaq hõc: "Mangai leq enh tiaq au, ep tamũa rađeh, ep xùi ðèh long pagat hu tiaq au.

²⁵ Majah qmang aih, mangai leq enh ðõng ðèh kan rìh, kan rìh aih èh hnhung, mangai leq jao au chiũq cađac qmòe rađeh, kan rìh mangai aih èh jah hlài.

²⁶ Mangai leq jah ðìq ðõng crõng taneh kô mahaq cađac hnhung ðèh mahua yiang, aih jah cleq? Haq aih èh yõi cleq hu baxon yõi hlài ðèh mahua yiang?

²⁷ Majah qmang aih, kô èh Kon mangai oe ta qne kan ranhòm ðèh Baq, pajùm ti bài ðình plình

đòeq hu loh crống taneh, jò aih èh haq baha am ka tang ngai tiaq tang yiniq wì ma khoe broq.

²⁸ Joq qnàng au doe ka pì: Taqne bài pì ma yòng jang kô, i qnah ngai ùh cachit adroe ka jah hnoq Kon mangai trùh dèh enh diac haq."

17

Tanoè bui wang

¹ Tadràu hì atìq ka aih, Chuaq Jesus aràng Phiero, Jaco xam Jon oh Jaco, tiaq haq tồc ta wang haqnèq.

² Ta aih haq wìh wìa enh ngèa wì aih hadrò haq ka ah tìah ka mat mahì, eo haq tabỗc tìah ka kan qngah.

³ Jò aih i Môise xam Êli trùh hatuàng ti Chuaq Jesus.

⁴ Phiero doe ka haq: Chuaq au! tanòe kô joq lem ka bèn oe, tàng troq ka manoh ìh, au broq piq toq hapom tacô, moeq ka Ìh, moeq ka Môise, moeq ka Êli.

⁵ Jò haq oe raq tapoch, i kan yùc tabỗc glàp dồng bài wì ma oe ta aih, i bàu tapoch loh enh yùc: "Hacô Kon calô Au, lem manoh Au rìm trong, thê tamàng bàu haq".

⁶ Jò bài mangai tiaq hỏc, tàng bàu aih, haq cro bla op dồng ta haqneq, wì dìq jaq crè.

⁷ Mahaq Chuaq Jesus lam haten, bèq wì haq rai doe: "Drah yòng beq! Ùh dùh yùq cadèh."

⁸ Mangai tiaq hỏc qngỗc ngan hnoq moeq ngai Chuaq Jesus raq.

⁹ Jò wì haq loh enh wang, Chuaq Jesus ùh lòh wì haq “Yiniq pì ma khoe hnoq, ùh dùh anoe hlài ka cabô, gòm trùh jò Kon mangai rìh hlài enh cachit”.

¹⁰ Mangai tiaq hóc bóch: Qmang aih hagleg bài mangai hnài ranenh doe Êli ep trùh adroe?

¹¹ Chuaq Jesus padreo bàu “Joq, Êli ep trùh òeog hu palauq hlài rìm trong.

¹² Mahaq au doe ka pì: Êli khoe trùh, wì ùh canau ka haq, mahaq wì tabroq ka haq tiaq dèh manoh cla. Kon mangai kô èh hanoh ep pòq kan xalep enh wì aih qmang ka haq aih diq.

¹³ Mangai tiaq hóc hi tem bàu haq, wì loq aih haq ràu trùh Jon Baptit.”

Chuaq broq brêh ka mangai jìq troq, ranhùà

¹⁴ Jò Chuaq Jesus xam mangai tiaq hóc wìh hlài tanòe bàc ngai, i moeq ngai thia haten, hacùn cràng enh ngèa ka Chuaq Jesus.

¹⁵ haq aih doe: Waiq Chuaq, ìh tamèt ka kon au diq, majah qmang aih haq loh ka jìq troq, jìq oe i jaq cleq, tacro yôt ta ùnh, cro yôt ta diac.

¹⁶ Au khoe qnàng haq trùh ti bài mangai tiaq hóc ìh, mahaq wì haqnaug ùh jah.

¹⁷ Chuaq Jeus padreo bàu: “Bài nang noe ùh i manoh lùì meh, au oe jah oe ti pì trùh pang leq? Au àt ka pì trùh jò leq? Aràng kon mangai qyoh aih tacô.”

¹⁸ Khoe aih Chuaq Jesus cwò kan kiac, kiac hi loh enh gùng ka kon mangai qyoh aih, pang aih kon qyoh aih jah brêh.

¹⁹ Mangai tiaq hóc thia haten ka Haq òeog hu bóch: Hagleg nhèn drùh kiac aih ma ùh jah?

²⁰ Chuaq Jesus padreo bàu: “Jao pì biaq manoh lùì: Au anoe joq qnàng ka pì, tàng joq pì i manoh lùì toq clong cachiq habài, pì thê wang kô: Qnhac enh kô tồc pah tau, haq hi qnhac rađeh, èh ùh i yiniq leq pì broq ma ùh jah. (I hset dùnh tam moeq brong)

²¹ Mahaq kiac qmang kô, tàng pì ùh waiq khàn rai apàm ka acaq, pì drùh haq ùh jah.

Jesus anoe adroe trùh dèh kan kachit

²² Jò Chuaq Jesus xam mangai tiaq hóc lam pajang gùng Galili, Haq doe ka wì: “Kon mangai kô èh mùt ta cadop tì wì.

²³ Èh wì jêh cađac Haq, mahaq trùh hì piq, Haq hi rìh hlài. Bại mangai tiaq hóc mangò haraya.

Chuaq Jesus am thèq

²⁴ Jò khoe trùh ta Cabênaum, bài mangai yóc thèq ka hnem kùh waiq lam bòch Phiero: Mangai hnài da ìh qmat i am thèq ùh?

²⁵ Haq padreo bàu: i. Jò Phiero mùt ta hnim Chuaq Jesus khoe chôn timer bòch haq: “Simôn, ìh hèm qmang leq? Bại bùa oe ta crông taneh kô yóc thèq cabô? Yóc da kon cla loq yóc da wì enh gùng?

²⁶ Phiero doe: yóc da wì enh gùng. Chuaq Jesus doe: “Tàng qmang aih bài kon calô haq ùh hiaq ep am thèq.

²⁷ Mahaq, òeq bèn ùh hiaq broq dua qmèq ka wì haq, ìh loh ta diac axai ka, rùp pliang ka ma kap axay adroe, wah hacùng haq, ìh hnoq mòeq hliac bac oe ta dalam. Aràng bac aih hu am thèq ka ba.

18

Mangai yeo haqnheq diq dõng oe ta diac plinh

¹ Jò aih bài mangai tiaq hõc thia haten ka Chuaq Jesus, wì haq bòch: Ta diac plinh mangai leq ma yeo haqnheq dõng ka mangai qnoeq?

² Chuaq Jesus creo ka moeq ngai kon qyoh, dõq haq oe ta qne bài mangai tiaq hõc.

³ Haq hi doe: “Tàng joq pì ùh tablòq hlài, dõq tìah ka kon qyoh kô, aih èh ùh i mangai leq jah mùt diac plinh.

⁴ Qmang aih mangai leq pa haqneq rađeh troeq kon qyoh kô, haq aih èh ma yeo haqnheq tanòe diac plinh.

⁵ Èh hòm oe enh dalam ka yiniq au mangai leq ma chiuiq òh kon mangai qyoh kô, aih haq òh au.

⁶ Mahaq, mangai leq broq ka moeq ngai kon qyoh qmang kô jò haq khoe lùì au cro ta yiniq lui, yõc apau hmo ma kàn taqmac ajang ranõng haq aih, khoe èh cadram caqnìh ta diac raxìq xan ka ùh hnau hòm.

⁷ Hão ka crõng taneh kô, majah qmang aih i bàc yiniq broq ka kon mangai catoeh! Hiloq waq ka i kan catoeh, mahaq joq hão ka mangai broq kan catoeh ka wì qnoeq!

⁸ Tàng joq tì qnì jènh pì broq ka pì cìh ta yiniq lui, drah pot khwênh cađac ma hangai ka pì, yac ka tapot jènh tapot tì mahaq jah mùt tanòe kan rìh halinh, ma hnau ka oe tòm baiq jènh baiq tì mahaq wì hwênh caqnìh tabau ùnh moeq òe.

⁹ Tàng mat pì broq ka pì cìh ta yiniq lui, drah ngwia khwênh cađac ma hangai ka pì, majah qmang aih yac ka oe moeq apah mat raq mahaq

jah mùt ta kan rìh halình, dua ùh hnau ka oe tòm baiq pah mat mahaq clìh ta bau ùnh ta hwinh.

¹⁰ Ngan oq!! Apa q jù moeq ngai kon qyoh leq oe taqne bài qyoh kô, majah qmang aih au doe ka pì, bình plình da wì haq qmat hnoq yôt hadrò Baq au, aih Mangai oe ta plình.

¹² Pì hèm qmang leq? Tàng mangai leq i moeq hrình toq trùu, yàng i mòeq toq lac hnhung, haq ma ùh òeq òo hachìn jàt hachìn toq kon trùu oe ta wang òeq hu lam chaq mòeq toq kon trùu ma khoe hnhung aih qmòh?

¹³ Joq qnàng au anoe ka pì, tàng joq haq chaq hi hnoq hlài, haq lem bùi ka kon trùu aih ùh hnau ka hachìn jàt hachìn toq kon trùu ma ùh hìaq hnhung tau.

¹⁴ Hadaì qmang aih diq, Baq pì oe ta plình hanoh ùh enh òeq ka mòeq ngai kon qyoh leq oe taqne bài kon qyoh kô hnhung cađac.

Oh daq loh yiniq ka dabau

¹⁵ “Tàng joq oh daq ìh troq loh yiniq ka ìh, tagàih ka haq jò moeq ngai ìh raq oe ti haq, tàng haq tàng bàu, ìh jah hlài dèh oh daq.

¹⁶ Tàng joq haq ùh tàng, ìh akhen tam moeq baiq ngai lam ti ìh, òeq bàu i baiq piq ngai wiang tamàng, aih èh rìm trong men loh ka kajap.

¹⁷ Tàng joq haq ùh tamàng bàu wì aih, aih ìh hi anoe ka Tagop Hadròeh, tàng joq haq dua ùh tàng bàu Tagop Hadròeh, aih hi ngan haq tìah wì mangai enh gùng tìah ka mangai yòc thèq diq.

¹⁸ Joq qnàng, au doe ka pì, waq toq yiniq cleq pì kàt rahnit ta crống taneh kô, ta plình hanoh kàt rahnit.

19 Joq qnàng, au anoe tam ka pì, tàng joq baiq ngai taqne pì hi hatroq manoh ti dabau, yac ka waiq trong leq, Baq au oe ta plình dua am ka wa haq.

20 Majah qmang aih, tanòe leq i baiq piq ngai canòm hiniq au hu àng tagop ti dabau, ta aih au oe taqne wì haq”.

21 Phiero lam haten ka Chuaq Jesus, haq bòch: Chuaq au, tàng joq oh daq au loh yiniq ka au, aih èh au ep cađac ka haq aih toq leq yàng? Ajoq ta pèh yàng ùh?

22 Chuaq Jesus padreo bàu: “Au doe ka ìh ùh xài tapèh yàng, mahaq tapèh jàt yàng tapèh”.

23 Qmang aih, diac plình tìah ka bùa tau, enh hatình dèh bac jèn ka bài mangai hapõng haq

24 Jò bùa bu ngan jàiq, wì qnàng ka haq moeq ngai pòq dòeh bùa moeq jàt muàn talàng.

25 Pàng haq aih pì i qmòe cleq hu caqnaih, wì craq thê tech cla haq, cadrì kon haq xam bài dahwèq haq, òe q hu caqnaih dòeh.

26 Mangai hapõng aih hi bla op ajang jènh cla craq rai waiq dang: Wì craq, ìh qnhùa ka au da adia, au hu caqnaih dõng da ìh!

27 Cla wì craq tamèt ha-och ta manoh, hi caqnaih haq hlài rai paclaih hloe dòeh ka haq.

28 Mahaq jò magai aih loh hlài, glàm moeq ngai bua haq ma hadai abroq qmoeq qmang ti haq, i pòq dòeh haq moeq hrinh ðoniê, haq it ranõng dèh bua aih rai doe: Drah caqnaih da au dòeh beq!

29 Bua haq bla op haqneq, rai waiq dang: Ìh qnhùa ka au adia, i au caqnaih dõng da ìh.

³⁰ Mahaq haq aih ùh qmòe blinh, dua waq ka rùp clêh đac dèh bua ta hnem tù, trùh jò leq claih dồng ka dòeh men waq hêq.

³¹ Bài bua haq hnoq qmang aih, wì mangò raya, lam taqmon dèh ka wì craq rìm yiniq ma khoe hnoq.

³² Cla wì craq creo ka mangai hapǒng aih trùh rai doe: “Ìh qmat joq mangai hapǒng ngang dù qnàng, au khoe cađac dồng dòeh ka ìh, jao ìh waiq đang au.

³³ Ìh ma ùh khòh loq ha-och dèh ka bua ma abroq moeq qmang ti ìh troeq au khoe loq waq ka ìh qmòh?”

³⁴ Cla wì craq nòeh haraya, hataq haq aih ka mangai wèq hnìm clêh mangai trùh jò leq haq claih dồng dèh ka dòeh.

³⁵ Tàng joq pì ùh òiq ka manoh caqnaih bài yiniq lui ka oh đaq, aih èh Baq au oe ta plình hanoh broq ka pì qmang aih òiq.

19

Cađac cadrì

¹ Khoe ka hnài qmang aih, Chuaq Jeus loh enh gùng Galili lam trùh ta gùng Giuđê, pah tau ka cròng diac Jôđan.

² I mangai bàc pì cajaan tiaq haq, haq broq brêh dồng ka mangai ma ùh hròc yiniq ta aih.

³ Mangai Pharisi trùh ten òoeq hu qnhro haq, wì bòch: Yac ka qmang leq, qmang leq, tiaq trong ranenh, mangai calô akhòh cađac mai ùh?

⁴ Haq padreo bàu doe: “pì ma qnhòq lah ngan ta hset, jò baxèm Boc Plình broq moeq mangai gualô xam moeq mangai gucadrì,

⁵ Haq i doe: Aih iq, mangai calô ma jah talah dèh ka miq baq, hu hatop dèh ti mai, wa baiq ngai hi wìa moeq xech qmòh?

⁶ Pang aih, òng mai pì oe xài baiq hòh, mahaq moeq chac raq. Qmang aih, kon mangai ùh khòh lah bài mangai Boc Plình ma khoe taqmroq”.

⁷ Wì bòch hòh: Tàng joq qmang aih hagleg Môise ma jah thê achìh jàiq ta cađac òeq broq bò acang, khoe aih dōq mai haq lam?

⁸ Chuaq Jesus doe: “Jao pì cadoq manoh Môise majah lòh pì cađac mai, mahaq jò baxèm ùh i qmang aih.

⁹ Au anoe ka pì, tàng joq mangai leq cađac mai, mahaq ùh xài jao haq tango, òeq hu lam yōc mai qnoeq, mangai aih loh mangai tango, èh hòh, cabô yōc cadrì wì ma cađac, mangai aih khoe i tuiq tango.

¹⁰ Mangai tiaq hōc doe: Tàng joq mangai gualô ep broq qmang aih, hēq ùh yōc dōng mai yì hnao hòh.

¹¹ Chuaq Jeus doe: “Ùh xài rìm ngai dìq hlàt wê bàu kô, mahaq dōq toq ka mangai Boc Plình ma khoe thê qmang aih.

¹² Majah qmang aih, i qnah ngai ùh yōc mai taiq jò ha-uang haq khoe qmang aih raq, i qnah ngai, ùh yōc mai jao enh tì kōng kon mangai broq, hadai i qnah ngai nhet ka diac plình, majah to broq ka rađeh dech. Mangai leq hlàt wê bàu aih wê beq”.

Wì kon qyoh

¹³ Khoe aih wì aràng trùh ka Chuaq Jesus bài kon qyoh, dōq haq roh tì ta chac wì haq rai waiq khàn am ka wì haq, mangai tiaq hōc tagàih ka bài mangai ma aràng.

¹⁴ Mahaq Jeus doe: “Dōq kon qyoh jah trùh ti au, apaq tāt wì haq, majah qmang aih diac plính aih da mangai leq ma tiah ka bài kon qyoh.”

¹⁵ Haq yōc tì bèq bòe kon qyoh, khoe aih haq loh lam.

Mangai radam kan padrōng

¹⁶ Jò aih, i moeq ngai trùh bòch Chuaq Jeus: Mangai hnài, trong lem leq au ma ep broq òeq hu jah kan rih mòeq òe?

¹⁷ Chuaq Jesus bòch: “Hagleq ìh ma jah bòch au trùh trong lem? I moeq Ngai raq malem. Tàng joq ìh enh jah kan rih halính moeq òe, ìh ep wèq bài ranenh”.

¹⁸ Haq aih bòch: Bài ranenh leq? Chuaq Jesus doe: “Bài ranenh kô: Apaq jêh đac mangai, ùh dùh tango, ùh dùh atùng, ùh dùh wiang tapoch hwang,

¹⁹ loq iu loq camaih ka miq baq rai loq ha-och dèh ka mangai haten tiah ka cla ìh”.

²⁰ Mangai radam aih doe: Au khoe wèq dìq dōng bài ranenh kô, oe i ranenh leq hòm?

²¹ Chuaq Jesus doe: “Tàng joq ìh enh waq ka geo gua, drah hlài tech dōng kùng hang ta hnīm òeq hu am ka mangai pa, qmang aih èh ìh hi jah hang lem ta diac plính, khoe aih hi lam tiaq au”.

²² Mahaq jò mangai radam tàng bàu aih, haq loh lam rai mangò haraya, majah qmang aih haq i kùng hang bəc pi cajaq.

²³ Chuaq Jesus doe ka mangai tiaq hóc: “Joq qnàng au doe ka pì, mangai padrǒng mùt diac plình joq xa haraya.

²⁴ Au anoe hòm ka pì lǒcđa mùt trom jrùm yi hlàu ka mangai padrǒng mùt diac Boc Plình”.

²⁵ Mangai tiaq hóc tàng bàu aih, dìq jaq hamàih, wì haq bòch: Qmang aih mangai leq majah dèch?

²⁶ Chuaq Jesus ngan bài mangai tiaq hóc: “Trong aih kon mangai broq ùh jah mahaq Boc plình broq trong leq dua jah”.

²⁷ Phiero doe: Hacô, nhèn khoe cađac dìq dǒng ðòeq tiaq Ìh, aih èh nhèn jah cleq?

²⁸ Chuaq Jesus padreo bàu: “Joq qnàng au anoe ka pì, trùh jò rìm ka yiniq loh ka neo dìq dǒng, aih jò Kon mangai hangui deh tagèq ranhòm cla haq, pì mangai ma khoe tiaq au hadai jah hangui ta moeq jàt baiq toq gèq, ðòeq hu hadrah ka moeq jàt baiq xinoe Isorali.

²⁹ Mangai leq taiq yiniq au loh qmòe ka cađac dèh oh daq calô, oh daq cadri, xam kon, xam taneh ruàng, xam hnim, mangai aih èh jah hlài yeo bàc ùh hnau ka aih hòm, èh jah kan rìh halình moeq ðòe.

³⁰ Mahaq bàc ngai adroe loh ka atìq, bàc ngai atìq loh ka adroe.

20

Mangai patìh ta wuàn plì nho

¹ Majah qmang aih, diac plình tìah ka wì craq ta hnim tau, bu padrèh qngah khoe loh lam, chaq mangai hu mùt abroq dèh ta wuàn plì nho,

² Jò haq khoe òq ka baha mangai patih, mòeq hi mòeq ñoniê, haq hi thê wì aih mùt dèh ta wuàn.

³ Qnah ta hachìn jò di sroq, haq aih lam hòm, hnoq bài mangai qnoeq, oe dech ùh i ka yiniq broq qnang yòng tanòe wì ma padro atech.

⁴ Haq doe ka wì aih: Pì mùt ta wuàn plì nho au beq, au baha pì ùh hìaq hamoq.

⁵ Wì aih hi drah lam. Jò qne hi trùh qnah ta piq jò, haq loh lam hòm, haq hadai broq qmang aih raq.

⁶ Canau khoe ta padam jò haq lam hòm, hnoq wì mangai qnoeq hòm yòng tanòe wì ti padro atech, haq hi bòch: Hagleq pì ma jah yòng ta kô xèq ka hì ùh dùh broq qmòe cleq?

⁷ Wì aih padreo bàu: Ùh i qmòe ka cabô creò ka nhèn broq. Haq doe ka wì aih: Pì hadai mùt ta wuàn au beq.

⁸ Trùh clam, cla wì craq wuàn nho doe ka mangai ma wèq ngan wì abroq: Lam creò ka wì ma abroq hu caqnaih da wì haq kùng, patep enh mangai ma atiq dǒng, èh hi trùh mangai ma adroe.

⁹ Wì mangai ma abroq pang padam jò di xèq jah yǒc moeq ngai moeq ñoniê.

¹⁰ Èh bài mangai ma abroq enh jò baxèm trùh, hèm dèh canau ñeh jah yeo bàc, yàng èh hadai moeq ñoniê.

¹¹ Jò khoe yǒc kùng baha, wì aih badrùt mamùc ka cla wì craq,

¹² wì haq doe: Bài mangai ma atiq qmat broq moeq ahyàc raq, ìh baha ka wì haq taq atoq qmòe ka nhèn kô bài mangai ma abroq lep xèq ka hì rai

catènh tôq.

¹³ Mahaq wì craq aih, anoe ka mòeq ngai taqne bài wì aih: Ê daq, au tình ka ìh ma i hamoq, ma ùh joq ìh khoe òq ka au moeq ðoniê raq qmòh?

¹⁴ Hêq yỏc da ìh kùng kan qmat khoe lam beq, au enh baha ka mangai ma atiq taq atoq qmang ka au khoe baha ìh diq.

¹⁵ Kùng hang cla, au ma ùh khòh broq tiaq dèh manoh cla qmòh? Ahiaq hnoq au rìh lem ka oh daq, mat ìh majah loh ka tajênh ùh xài?

¹⁶ Aih, mangai atiq loh ka adoe, mangai adroe loh ka atiq, aih qmang aih.

Chuaq Jesus anoe adroe dèh kan nanxa

¹⁷ Jò Chuaq Jesus tỏc ta Jêrusalem, haq qnung dèh moeq jàt baiq ngai tiaq hỏc raq lam tiaq rađeh, ti trong, haq doe ka wì:

¹⁸ “Beq, bèn tỏc ta Jêrusalem, Kon mangai kỏ êh, wì jah rùp am ka bài pajàu kàn xam bài mangai hnài ranenh, wì aih èh ma hatình ka dabau hu chaq trong jẻh đac haq.

¹⁹ Wì aih èh rùp haq am ka bài mangai ùh xài mangai Judà, dòq wì aih do halê, blai, èh tiang đình haq ta long pagat, trùh hì piq, haq hì rìh hlài”.

²⁰ Khoe aih, i mai da Sêbêđê xam wa kon haq trùh haten ka Chuaq Jesus, hacùn cràng enh ngèa ka Chuaq Jesus ðòeq bỏch haq moeq hiniq.

²¹ Chuaq Jesus bỏch haq: “Ìh enh bỏch cleq?” Mangai gucadrì aih doe: Ìh am wa kon au kỏ mòeq ngai jah hangui pah qma ka ìh, mòeq ngai jah hangui pah qngeo ka Ìh oe ta diac ìh.

²² Chuaq Jesus doe: “Pì ùh qnì ka raḏeh qnang bòch cleq, chrõng au ma ôq kô èh pì ôq ajah?” Wa aih padreo bàu: Ma ôq jah.

²³ “Joq chõp kô èh ôq chrõng au mahaq hangui pah qma, pah qngeo ka au, aih ùh xài au am, nòe aih òòeq toq ka bài mangai Baq au khoe palauq adroe”.

²⁴ Moeq jàt ngai tiaq hõc tau, tàng bòch qmang aih, wì haq nòeh ka wa oh daq aih.

²⁵ Mahaq Chuaq Jesus creo ka wì trùh, haq doe: “Pì loq, bùa bài diac wì padit dòq wì qnoeq patìh ka raḏeh, bài cwan kàn yo dèh cwìang òòeq hu oe enh qnhèq ka wì.

²⁶ Yàng pì kô ùh xài qmang aih, mahaq taqne pì mangai leq enh broq kàn, mangai aih ep broq hapõng pì,

²⁷ mangai leq enh broq gàu, mangai aih ep broq díc pì.

²⁸ Qmang ka Kon mangai khoe trùh, ùh xài òòeq mangai qnoeq patìh ka raḏeh, mahaq òòeq cla raḏeh patìh ka wì, rai phùq dèh kaxènh broq maneh òòeq hu baxon yõc hlài bàc ngai.

Baiq ngai ùh xau oe ta Giêrico

²⁹ Jò Chuaq Jesus xam mangai tiaq hõc loh enh plài Giêricô, i mòeq calùh mangai ra rawình ti tiaq haq.

³⁰ I baiq ngai lua mat oe kènh trong, tàng doe i Chuaq Jesus lam pagat trong aih, wa aih creo cadêh: Waiq Chuaq, kon xau bùa Đawit, ha-och ka ma diq!

³¹ Wì lech ka wa aih, thê wa hatinh, mahaq wa aih creó yeo dêh hòim: Waiq Chuaq, kon xau bùa Đawit, ha-och ka ma diq!

³² Chuaq Jeus hi yòng, creó ka wa aih trùh, haq bòch wa: “Chôp ênh au broq ka chôp cleq?”

³³ Wa aih doe: Ma ênh mat ma jah xau hnoq.

³⁴ Chuaq Jesus ta manoh ha-och ka wa. Haq bèq mat wa, tajòe qmòe wa jah xau hnoq, èh wa hi tiaq hloe Haq.

21

Mùt ta Jerusalem

¹ Jò Chuaq Jesus xam bài mangai tiaq hóc khoe ten trùh ta Jêrusalem, khoe trùh ta Bêpha-giê, haq hi tọc ta wang Ôliu, khoe aih haq thê baiq ngai tiaq hóc.

² Haq doe: “Chôp mùt ta plài ênh ngèa ka chôp qmat, chôp hi hnoq moeq toq lùa kan wì khoe kàt xam kon haq, chôp caqnaih èh dùì aràng ka au tacô.

³ Tàng i cabô doe cleq, chôp doe ka wì Chuaq i yiniq waq ka baiq toq lùa kô, aih èh wì hi caqnaih ka chôp tiaq”.

⁴ Yiniq kô loh qmang aih đòeq xít troeq bàu pajàu khoe anoe:

⁵ Anoe ka kon cadrì Siôn,

Kô, bùa pì trùh ti pì,

Khun khuuq, oe ênh crống lùa

Aih lùa kon, kan haq bac long ech.

⁶ Mangai tiaq hóc hi loh lam rai broq tiaq qmang ka bàu haq khoe tanap.

⁷ Wa dùì lùà kan xam kon haq, yǒc dèh eo hlèch enh crǒng lùà, khoe aih dèch Chuaq Jesus tǒc hangui enh qnhèq.

⁸ Haraya cađac mangai yǒc eo hlèch ti trong lam, mangai qnoeq hò m goh hamenh long xap ti trong.

⁹ Dìq ka wì ma lam adroe xam mangai lam atìq hadai creò ka dèh: Hôšana, Kon bùà Đawit! Khòh manè Haq mangai ma yǒc Yiniq Chuaq ðòeq trùh ti bèn! Hôšana oe tanòe ma dìq jaq haqn hèq.

¹⁰ Jò khoe mùt ta Jêrusalem, ðìq ðǒng ka wì tagùng aih loh ka tagruàng tagrát, wì bòch dabau: Mangai kô ìq cabô?

¹¹ Mangai bàc ta aih padreo bàu: Kô Chuaq Jesus, Mangai pajàu oe ta Naxaret, gùng Galili.

Chuaq drùh qnoh bòe mangai padro

¹² Chuaq Jeus mùt ta nòe hnem Kùh waiq, drùh qnoh ðìq ðǒng bài mangai padro ta aih, hacùp cabǒng bài mangai ti halìh bac jèn, caqn hùt ðac gèq bài mangai tech trù hangui.

¹³ Haq doe ka wì: “I bàu khoe achìh, hnim au jah creò hnim waiq khàn, mahaq pì broq hnim aih loh kòp atùng.

¹⁴ Jò aih, bài mangai ùh xau hnoq, mangai liap, trùh ti haq tanòe hnim kùh waiq, haq broq brèh ðǒng ka wì.

¹⁵ Mahaq bài pajàu kàn, bài mangai hnài ranenh hnoq kan halac haq khoe broq, èh wì tàng tam bàu kon qyoh cachech ta hnim kùh waiq: Hôšana Kon bùà Đawit! Wì plòh nòeh,

¹⁶ wì doe ka haq: Ìh atàng bàu bài kon qyoh anoe cleq ùh? Chuq Jesus doe: “Au tàng. Pì qnhòq

lah đóc bàu kô ta hset hadròeh qmòh? Chuaq khoe jah bàu manè loh enh hacùng kon qyoh xam kon qyoh oe ùq qmòh?”

¹⁷ Khoe èh haq hi cađac wì aih haq mùt ta plài Bêthani, mang aih haq kùt ta aih.

¹⁸ Sroq èh, jò wìh hlài ta Jêrusalem, haq pangot.

¹⁹ Hnoq ti trong i moeq xèm long póc, haq thia ka haten, yàng hnoq toq hla, haq cwò ka long póc: Gè kô èh pì jò leq oe loh plì hòm! Long póc croh qmòe jò aih raq.

²⁰ Mangai tiaq hóc hnoq qmang aih, wì haq hamàih, wì bòch: Hagleq bu moeq hyàc long póc ma khoe croh qmang qmat?

²¹ Chuaq Jesus doe: Joq qnàng! au anoe ka pì, tàng joq pì i manoh lùt ùh hìaq rangòt, ùh xài pì broq jah toq yiniq khoe broq ka long póc kô, yac ka pì doe ka bui wang kô: Dèch caqñih rađeh ta diac raxiq beq, yiniq aih broq dua jah.

²² Jò waiq khàn, pì yóc manoh lùt òdeq waiq khàn, yac ka pì bòch cleq, dua jah đong òq.

Wì bòch trùh kwìang da Chuaq Jesus

²³ Jò Chuaq Jesus khoe mùt ta hnim kùh waiq, haq qnang hnài wì, i bài pajàu kàn xam bài gucraq mangai Judà trùh bòch haq: Ìh yóc cwìang enh leq ma hu broq qmang kô, cabô khoe am ka ìh cwìang kô?

²⁴ Chuaq Jesus padreo bàu: “Au hanoh bòch pì mòeq yiniq, tàng joq pì têu da au, au hanoh anoe am ka pì loq au yóc cwìang enh leq ma broq bài yiniq kô.

²⁵ Baptem da Jon aih loh enh leq? Loh enh diac plình loq loh enh kon mangai?” Wì aih hatuàng

ka dabau: Tàng joq bèn doe loh enh plình, aih èh haq bòch bèn qmang aih gleq pì ùh lùì?

²⁶ Tàng bèn doe: Loh enh kon mangai, aih bèn ùh hùà ka wì phù cròng, majah qmang aih diq ka phù cròng mangai leq mangai meh diq doe Jon aih pajàu.

²⁷ Wì doe ka Haq: Nhèn ùh qnì. Chuaq Jesus doe ka wì: “Au hadai ùh doe ka pì loq cwiàng enh leq ma broq bòe yiniq kô”.

Aliah trùh baiq ngai kon calô.

²⁸ Pì hèm qmang leq? I moeq ngai tau, haq i baiq ngai kon calô, haq doe ka mangai kon ramua: Kon! hì kô kon lam broq ta wuàn nho oq.

²⁹ Kon aih doe: Òq baq, mahaq khoe aih haq ùh waq lam.

³⁰ Khoe aih, mangai baq lam ajang kon ma hatia, hanoh doe qmang ka adroe iq diq. Kon ma kô doe: Au ùh enh lam. Yàng khoe ka aih haq hèm hlài, haq hi lam.

³¹ Taqne wa aih mà leq ma broq tiaq bàu dèh baq?” Wì doe: Mangai ma atiq. Chuaq Jesus doe ka wì aih: “Joq qnàng au anoe ka pì, bài mangai ti yõc thèq xam bài gucadri ti taqnung tango jah mùt diac Plình adroe ka pì.

³² Majah qmang aih Jon khoe tiaq trong taq atoq lam trùh ta pì, mahaq pì ùh lùì haq, yàng bài mangai ti yõc thèq xam bài mangai gucadri ma taqnung tango aih khoe lùì haq, èh da pì hòm yac ka khoe hnoq qmang aih, dua ùh waq raxach òdeq hu lùì haq.

Bàu tapoch patiah trùh bài mangai pít nho

³³ Pì tamàng tam bàu aliah qnoeq hòm. I mòeq ngai pít wuàn nho, haq kàng canàng dudan, enh dalam haq chìa moeq toq ralùng hu broq alac, èh haq broq moeq toq hapom haqnhèq, khoe aih haq am ka wì muàn pít ta axong, cla haq lam gùng qnoeq.

³⁴ Trùh jò git pìl, cla haq thê dèh mangai hapǒng trùh ta nòe bài mangai ma abroq ta aih, òeq hu yǒc dèh pìl.

³⁵ Bài mangai pít nho rùp bài mangai hapǒng aih, wì hwat mangai kô, jêh đac mangai meh, yǒc hmo đap mangai tau.

³⁶ Cla wì craq, thê hòm bài wì hapǒng ma qnoeq, yeo bàc ka yàng adroe, yàng èh hadai wì tabroq ka bài hapǒng kô tiah ka bài hapǒng ma adroe diq.

³⁷ Atiq dǒng, cla wì craq thê dèh kon cla haq trùh ta wì aih, majah qmang aih haq hèm dèh ta manoh: Kon cla au kô, wì aih loq yi camaih.

³⁸ Mahaq, jò bài mangai pít nho hnoq kon aih, wì haq doe ka dabau: Kô raq mangai hu jah waq dǒng kùng hang, beq bèn jêh đac hloe èh bèn hu blah yǒc hloe hang haq.

³⁹ Wì hi rùp mangai kon aih, qnoh enh gùng ka wuàn pìl nho, jêh cađac hloe.

⁴⁰ Qmang aih èh jò cla wì craq trùh haq broq ka bài mangai pít nho kô qmang leq cadèh?

⁴¹ Wì padreo bàu: Cla wì craq aih trùh haq jêh palùng đac bài ngang dù aih, èh haq yǒc hlài dèh wuàn òeq am ka mangai qnoeq patih acaq axon, aih la bài mangai waq toq hi trùh jò hi dèch am phàn da cla wì craq.

⁴² Chuaq Jesus doe: “Pì ma qnhòq đóc ta hset Hadròeh:

Hmo bài mangai broq hnem khoe qnìh đac, khoe wìa hmo mùm hnim.

Aih yiniq Boc Plình broq. Ma ùh joq kan halac enh ngèa bèn qmòh?

⁴³ Aih au ma jah doe ka pì, diac Boc Plình jah doeh yóc enh pì qmat èh đòeq hu am ka mangai qnoeq aih la bài mangai ma loh plì lem am ka diac aih.

⁴⁴ Cabô ma taclìh enh crông hmo aih èh, haq hech pòh dồng dìq, hmo aih clìh enh qnhèq ka cabô, mangai hadai hech loh blo”.

⁴⁵ Bài mangai hnài ranenh xam mangai Pharisi tàng bàu aih, wì loq Chuaq Jesus tapoch ka wì haq;

⁴⁶ wì chaq yiniq hu rùp haq, mahaq yùq ka phù crông, majah qmang aih wì phù crông khoe doe Chuaq Jesus aih mangai pajàu.

22

Aliah trong yiniang yinàng kàn

¹ Chuaq Jeus aliah tam ka wì aih:

² “Diac plình tiàh ka bùa tau, haq broq yiniang taqnèp dèh ka kon.

³ Bùa aih thê dèh bài hapống lam bahmàng baàimangai ma khoe jah akhen trùh acaq yiniang mahaq wì aih ùh waq trùh.

⁴ Bùa thê hòm bài hapống qnoeq lam rai tanap: Doe ka bài mangai ma khoe jah bàu akhen: Au khoe padon yiniang yinàng bo xam jam ramaq au khoe bùi, cleq clài hadai khoe padon đòeq, drah trùh hu hangui acaq yiniang.

⁵ Mahaq wì ùh do tamàng, mangai lam dèh hra trong, mangai kô loh ta ruàng, mangai tau lam padro,

⁶ mangai qnoeq hòh rùp hapǒng bùa aih jêh cađac.

⁷ Bùa nòeh haraya, thê bài linh jêh dǒng bài magai dù aih, bùh hloe plài wì haq.

⁸ Khoe aih, bùa doe dèh ka bôe hapǒng: “Yiniang yinàng khoe padon, mahaq bài mangai ma khoe jah akhen aih pi tajì ka acaq.

⁹ Manòeq, pì loh lam roc halah trong, waq toq hnoq mangai leq, akhen ma dìq lam acaq yiniang tacô.

¹⁰ Bài mangai hapǒng lam jàp rìm trong ta aih, tagop dìq mangai wì haq glàm, lem qmèq ùh loe, ta hnìm loh ka bìn bauq mangai hangui acaq yiniang yinàng.

¹¹ Bùa mùt ngan mangai acaq yiniang, ka doe hnoq ta aih i moeq ngai ùh caxùnh eo yiniang.

¹² Bùa doe ka haq aih: Ûih daq, hagleq ìh mùt tacô ma ùh caxùnh eo yiniang taqnèp? Mangai aih hatinh.

¹³ Bùa thê baàimangai hapǒng: Kàt jènh tì haq qmat, khwênh qnoh ta clam tau, tanòe ma toq crò hmoe rai cadrit haneng.

¹⁴ Majah qmang aih bàc ngai jah creo mahaq toq biaq ngai raq ma jah ràih.

Am thèq ka Sêsa

¹⁵ Khoe aih, mangai Pharisi loh enh gùng hatuàng ka dabau chaq trong hu bahlac Chuaq Jesus trong bàu tapoch.

¹⁶ Wì haq thê dèh mangai tiaq hóc taqmùt ti bòe bua da bùa Hêrôt lam bóch Chuaq Jesus: Mangai hnài, nhèn loq ìh kô joq qnàng, tiaq kan taq atoq ìh hnài trong Boc Plình, ùh wiang enh cabô, majah qmang aih ìh ùh ngan da wì toq enh gùng.

¹⁷ Doe ka nhèn loq ìh hèm qmang leq: Am thèq ka Sêsa aih troq loq ùh?

¹⁸ Chuaq Jesus loq manoh wì haq qmèq, haq doe: “Wùih bài mangai toq ti patìah meh, hagleq pì ma bahlac dèh ka au?

¹⁹ Am au ngan hliac pì ma òòeq am thèq. Wì aih am ka haq mòeq òniê.

²⁰ Haq bóch: “Kô ìq qmù cabô, achìh kô achìh cabô.

²¹ Wì doe: Sêsa. Khoe aih Haq doe ka wì: “Padreo da Sêsa yìiniq cleq da Sêsa, padreo da Boc Plình yiniq cleq da Boc Plình.

²² Jò khoe tàng bàu aih, wì hi loh ka lui ta manoh. Èh wì hi lam.

Kan rìh hlài

²³ Hanoh hì aih, mangai sadusê, aih bài ma mangai doe ùh i ka kan rìh hlài, lam haten ka Chuaq Jesus, wì bóch:

²⁴ Mangai hnài ôi, Môise i anoe: Tàng joq mangai leq cachìt mahaq ùh i ha kon, oh haq aih ep yòc cadrì dèh daq ma khoe hadrô aih.

²⁵ Qmang aih nhèn i ta pèh ngai oh daq. Mangai daq ramua cachìt, mahaq qnhòq i kon, mai haq òòeq hlài dèh ka oh.

²⁶ Èh mangai daq ma hatia, mangai daq ma atìq trùh mangai ma atìq dǒng hanoh qmang aih diq.

²⁷ Pu lùch, mangai gucadrì aih hanoh cachìt.

28 Aih èh trùh jò rìh hlài, taqne wì tapèh ngai aih, mangai gucadrì aih èh broq mai cabô? Majah qmang aih dìq dǝng wì haq khoe yǝc mangai cadrì aih broq mai.

29 Chuaq Jesus doe: “Pì hèm ùh troq, majah qmang aih pì ùh qnì ka hset Hadròeh, èh hadai ùh qnì cwìang itai Boc Plình qmang leq.

30 Majah qmang aih, trùh jò rìh hlài, kon mangai ùh yǝc mai, ùh yǝc ǝng, mahaq bài mangai rìh hlài tìah ka òhnh plình oe ta plình.

31 Pì ma qnhòq ngan bàu Boc Plình anoe trùh kan rìh hlài da mangai cachìt:

32 “Au kô Boc Plình da Apraham, Boc Plình da Ysac, Boc Plình da Jacôp qmòh? Boc Plình ùh xài Boc Plình da bài mangai cachìt, mahaq Boc Plình da bài mangai rìh.

33 Tàng qmang aih, wì hamàih ka bàu Haq hnài.

Ranenh ma yeo kàn

34 Mangai Pharisi tàng doe Chuaq Jesus khoe broq ka bài mangai Sađusê pì jah hah hacùng, wì haq tagop dabau.

35 Taqne wì aih i mòeq ngai hnài ranenh bòch Chuaq Jesus bàu kô òeq hu qnhro ngan haq:

36 Mangai hnài ôi, oe ta hset ranenh, ranenh leq ma yeo kàn dìq dǝng?

37 Chuaq Jesus padreo bàu: “Ìh ep dìq ka cliac, dìq ka mahua yiang, dìq ka manoh loq waq ka Boc Plình.

38 Aih ranenh angoe ma yeo kàn dǝng ka maqnoeq.

39 Ranenh ma atìq kô hadai qmang aih: Ìh ep loq waq ka mangai haten hatìa ka ìh tìah ka cla.

⁴⁰ Dìq dǒng ka ranenh xam bàu pajàu dìq loh enh baiq ranenh aih.

Christ kon xau Davit

⁴¹ Jò bài mangai Pharisi oe moeq qmang ti dabau, Chuaq Jesus bòch wì haq:

⁴² “Ràu trùh Christ, pì hèm qmang leq? Haq aih kon cabô?” wì doe: Kon bùa Đawit.

⁴³ Haq padreo bàu ka wì aih: “Tàng qmang aih gleq bùa Đawit canòm ka Yeang Hadròeh, haq ma creo ka Christ aih Chuaq au, haq doe:

⁴⁴ Chuaq doe ka Chuaq au,

Hangui enh pah qma au,

Trùh jò au roh bài mangai ma tablêq ka ìh enh qneq ka jènh ìh?

⁴⁵ Tàng joq jò aih Đawit khoe creo ka Haq aih: Chuaq au, aih haq broq kon bùa aih qmang leq?”

⁴⁶ Pì i cabô oe jah tèu mòeq nà bàu, èh hanoh pang aih, pì i cabô oe hùa bòch haq cleq hòh.

23

Chuaq Jesus tapoch ka mangai jiang bàu

¹ Khoe aih Chuaq Jesus anoe ka bài mangai ta aih hloe xam ka mangai tiaq hǒc:

² “Bài ngai hnài ranenh xam mangai Pharisi dìq hangui tagèq Môise.

³ Qmang aih pì ep broq tiaq rai wèq rìm trong wì haq khoe hnài pì, mahaq apaq top dua wì haq, majah qmang aih wì haq ùh broq tiaq dèh bàu ðeh ma hnài.

⁴ Wì aih yǒc kan trap, kan tawac, taqmac ta plêh wì qnoeq, mahaq cla ùh wiang poh moeq hadrang tì ta aih.

⁵ Rìm yiniq wì haq broq aih òòeq toq ka mangai qnoeq hnoq, balet akia da wì haq wê waq ka yeo kàn, cadrai eo waq ka yôh,

⁶ tanòe acaq ôq wì haq enh toq hangui nòe ma rahù, ta hnim tagop wì haq enh toq haqngui nòe yeo haqnèq dõng,

⁷ enh toq mangai qnoeq kùp gàu ka raðeh taqne chòq, enh ka mangai qnoeq creò ka raðeh Rabi!

⁸ Mahaq pì apaq dòq wì qnoeq creò ka raðeh Rabi, majah qmang aih òìq ka pì i mòeq Mangai hnài raq, òìq dõng ka pì qmat aih oh daq dabau.

⁹ Hadai qmang aih, oe ta crõng taneh kô apaq creò ka cabô aih baq raðeh, majah qmang aih pì i mòeq ngai Baq raq, haq aih ta Plình.

¹⁰ Hadai paq òòeq cabô creò ka pì mangai hnài, majah qmang aih òìq ka pì i mòeq Mangai hnài raq, aih Christ.

¹¹ Mahaq taqne pì mangai yeo kàn dõng, haq aih èh jah broq hapõng bàì pì.

¹² Mangai leq padèch raðeh ka haqnèq, haq aih èh jah caqnìh qnoh haqneq, hadai qmang aih, mangai leq hamon raðeh ka haqneq haq aih èh jah padèch ka haqnèq.

¹³ Hào ka pì, bàì mangai hnài ranenh xam mangai Pharisi, bàì mangai patiah toq enh gùng! Majah qmang aih pì clenq qmang diac plình enh ngèa wì qnoeq, pì qnhòq lah mùt ta aih mahaq tàng i mangai leq enh nùt aih pì tàt òac.

¹⁵ Hào ka pì, bàì mangai hnài ranenh xam mangai Pharisi, bàì mangai patiah toq enh gùng! Pì lam jàp tadiac jàp tago òòeq adràc mangai tiaq

trong da pì, jò adràc khoe jah pì broq ka wì aih wìa mangai ta hwinh yi hnau cla pì baiq yàng.

¹⁶ Hào ka pì! Bòi mangai ùh xau broq mangai qnung trong, pì doe: Tàng i cabô patô hnim kùh waiq òe hu hapah, aih ùh troq cleq, mahaq tàng patô wang oe ta hnim kùh waiq òe hu hapah, aih èh ep hlac dèh ka bàu hapah aih.

¹⁷ Wùih! Mangai rai blùng rai lua meh, wang xam hnim kùh waiq ma broq ka wang aih jah hadròeh, maleq ma yeo kàn.

¹⁸ Pì anoe rameh hòh: Tàng mangai leq patô prang oe tahnim kùh waiq òe hu hapah, aih ùh troq cleq, mahaq tàng patô ramèn h tadreo oe ta prang òe hu hapah, haq aih èh khoe hlac dèh ka bàu.

¹⁹ Wùih! mangai lua tau, ramèn h tadreo, èh prang mabroq ka ramèn h aih jah hadròeh, wa aih maleq ma yeo kàn?

²⁰ Qmang aih mangai leq patô prang ta hnim kùh waiq òe hu hapah, aih haq patô xam prang xam ramèn h oe ta prang aih,

²¹ mangai leq patô hnem kùh waiq òe hu hapah, aih haq patô xam hnim xam Mangai oe ta hnem kùh waiq aih,

²² mangai maleq hòh ma patô plình òe hu hapah, aih haq patô gèq Boc Plình xam Haq ma hangui tagèq aih.

²³ Kan hào ka pì, bòi mangai hnài ranen h xam mangai Pharisi, bòi mangai patìah toq enh gùng! Majah qmang aih pì dèch ka Boc Plình moeq phàn moeq jàt cachiq bôc ha, cachiq xua thùm, cachiq thila, mahaq trong ma yeo haqnèq òi q dõng ta ranen h aih pì cađac, aih la kan taq toq, kan loq

waq xam manoh ùh tablòq, aih bài yiniq pì ep broq, mahaq hadai ùh jah cađac bài yiniq tau.

²⁴ Wùih! bài mangai ùh xau broq mangai qnung trong, pì doeh đac pliang roe qyoh mahaq lonh yóc kan o lócđa kaiq!

²⁵ Hăbô ka pì! bài mangai hnài ranenh xam mangai Pharisi, bài mangai patiah toq enh gùng! Majah qmang aih, dôt doe pì haliang toq enh gùng, yàng enh dalam bình bauq toq kan atùng kan plai.

²⁶ Wùih bài mangai Pharisi lua mat tau, baxèm aih xài haliang enh dalam adroe, khoe aih enh gùng diq đòeq haq hanoh jah hreo.

²⁷ Hăbô ka pì, bài mangai rabiaq trong ranenh xam mangai Pharisi bài mangai patiah toq enh gùng! Majah qmang aih pì tìah ka ralùng hanang, palàng taboc toq enh gùng waq ka lem, mahaq enh dalam bình toq caxènh hanang xam bài kan trùq traq.

²⁸ Pì hanoh qmang aih diq, enh gùng aih loh mangai taq atòq, mahaq enh dalam bình toq kan loq patiah xam yiniq lui.

²⁹ Hăbô ka pì! bài mangai hnài ranenh xam mangai Pharisi, bài mangai patiah toq enh gùng! Pì xùh hanang mangai pajàu, palàng hanang mangai taq atòq,

³⁰ rai doe: Tàng joq bèn hadai rìh mòeq qnhòng ti wì kan cadraq nèh, bèn ùh taqmùt ka wì haq đòeq hu broq ta-ùc mahim mangai pajàu.

³¹ Qmang aih cla pì panhìn rađeh kô joq qnàng caxi noe bài mangai khoe jêuh đac bài mangai pajau.

³² Qmang aih drah broq beq dôq haq bình dồng ka maneh kan cadraq ma khoe patep.

³³ Wùih bài bìh, bài xi noe bìh plổng tau, broq qmang leq pì ma claih ka kan hadrah ta hwinh.

³⁴ Dài aih raq, au ma jah khoe thê bài mangai pajaù, bài mangai rabiaq loq, xam mangai hnài ranenh trùh ti pì, taqne wì aih, i ngai pì jêh cađac, tiang đình wì haq talong pagat, i ngai pì blai wì haq tanòe hnim tagop qyoh, pì hadai ti hnan rùp wì aih enh gùng kô trùh gùng tau,

³⁵ waq ka đìq dồng ka mahim ùh i đêh ka yiniq lui cleq dahrôq jàp ta taneh, ta-ùc hlài ta pì, enh mahim Abên mangai taq atoq trùh mahim Xachari, kon da Barachi, mangai pì ma khoe jêh cađac ta adreo hnim kùh waiq xam prang tadreo.

³⁶ Joq qnàng au doe ka pì, đìq dồng bài yiniq aih èh jah trùh ti caxi noe kô.

³⁷ Jêrusalem, Jêrusalem, ìh jêh đac wì mangai pajàu rai yỏc hmo tèm bài mangai au ma khoe thê wì trùh ta pì, khoe bàc yàng au enh tagop bài kon ìh tìah ka ìa kan creo deh kon trùh hu àm ta caqnàm pananh, mahaq pì ùh waq.

³⁸ Kô èh, hnim pì cađac klui dồng!

³⁹ Majah qmang aih, au doe ka pì, kô èh pì pi hnoq au hòm, trùh jò leq pì ma hi doe: Xôq ramot ka Mangai trùh enh dalam ka yiniq Chuaq!

24

Hnem kùh waiq ta Jêrusalem ralòeh, hì Jesus wìh hlài

¹ Chuaq Jesus loh enh hnim kùh waiq, jò qnang lam ti trong, mangai tiaq hỏc trùh haten ka haq

đòeq patô ka haq hnoq kan ranhòm ta hnìm kùh waiq.

² Chuaq Jesus bòch wì aih: “Pì i hnoq òi òng rìm yiniq taqmat ùh? Joq qnàng au doe ka pì, kô èh pì i moeq pliang hmu leq oe jah taraxon enh crông hmo leq hòm, òi ep cùh òng taqneq.

³ Jò Chuaq Jesus hangui ta bui wang Ôliu, mangai tiaq hỏc thia crài ti haq, wì doe: Ìh anoe ka nhèn loq òi, bài biac aih jò leq ma trùh? Qnah hòm i kan halac cleq mahnu jò Ìh trùh, xam hì crông taneh kô ma hu lùch.

⁴ Chuaq Jesus padreo bàu: “Ngan oq, paq òq cabô padô pì.

⁵ Majah qmang aih bàc ngai patìah ka yiniq au òeq trùh doe: Au kô raq Christ, rai ti aluàn bàc ngai.

⁶ Èh pì tàng anoe trùh kan tajêh tablah, xam bàu tajêh tablah: drah wèq rađeh, apaq lèt, majah qmang aih bài yiniq aih ep trùh, mahaq kan atiq lùch qnhòq trùh.

⁷ Nang noe kô yòng tablêq ka nang noe tau, diac kô tablêq ka diac tau, bàc nòe i kan pangot hrah xam taneh ralàng.

⁸ Mahaq òe yiniq aih bu qnang baxèm kan haò.

⁹ Jò aih èh wì rùp tah pì ta kan nanxa hu jêh đac, rìm diac git ka pì ajang yiniq au.

¹⁰ Jò aih èh i bàc ngai cađac manoh lù rai blòq dabau rai git ka dabau.

¹¹ Bàc òe mangai pajàu patìah plòh loh rai padô qnùt bàc ngai.

¹² Nah hòm taiq kan dù rai èh rai bàc dài manoh

loq waq da bàc ngai majah hi loh ka rai èh rai hangeo.

¹³ Mahaq mangai leq cajap manoh trùh lùch trùh gèh, aih èh ma jah dèch.

¹⁴ Bàu lem da diac Boc plình kô èh jah hnài jàp tnna crông tanèh, ðòeq panhìn ka rìm diac. Jò aih èh kan lùch hi trùh

¹⁵ Jò pì hnoq kan amùà broq ka raliang nòe hadròeh, pajàu Ðaniên khoe anoe trùh (cabô ðóc khòh hmàng),

¹⁶ jò aih mangai leq oe gùng Jiudê drah amot tọc ta wang,

¹⁷ cabô oe ta kùà po hnim, ùh dùh loh qnhon kùng hang ta hnim,

¹⁸ mangai leq oe ta ruàng, apaq wìh hlài ta hnim hu yọc eo.

¹⁹ Jò aih, joq hamoq qnàng ka mangai gucadri wê cliac xam mangai cadri kon oe ùq!

²⁰ Drah waiq khàn ðòq pì ùh hìaq ep cadàu glàm jò ralìm, ùh hìaq glàm hì Sabat,

²¹ Majah qmang aih i kan nan no kàn, jaq enh jò baxèm i crông tanèh trùh hloe manòeq qnhòq hmaq i qmang aih, yac ka atìq kô èh dua pì i qmang aih.

²² Tàng joq bài hì aih ùh qnhùa hlài qnah, ùh i moeq ngai leq oe rìh, mahaq taiq i pì bài mangai ma khoe jah ràih, bài hì aih ma khoe jah pot hlài qnah.

²³ Jò aih, tàng joq i cabô doe ka pì: Ngan! hacô raq Christ, tàng ùh meh doe: Hatau haq, apaq lùì bài aih.

²⁴ Majah qmang aih bàc Christ patìah, pajàu patìah trùh, broq bàc kan halac, tàng majah wì

aih trùh hu padô hloe pì aih mangai ma khoe jah raih.

²⁵ Ngan oq, au khoe chôn̄h doe ka pì adroe.

²⁶ Tàng i mangai leq doe ka pì: Hatau! Haq oe tanòe go hawit, pì apaq lam, tàng ùh meh wì doe: Hacô! haq oe trom h̄nem. ùh dùh lùì dèh.

²⁷ Majah qmang aih tiah ka kan camlet cađah enh gùng mahì loh cadàu trùh apah mat mahì clìh, Kon mangai trùh hadai qmang aih.

²⁸ Taleq i hanang jam om cachit, bài cliang apùq dabau ta aih.

²⁹ Kan nanxa ta hì aih bu khoe, mat ma hì tajòe qmòe loh ka clam, mat khê hadai pì qngah, bài halǒng taclìh enh plình, èh bài cleq clài ma oe ta plình hanoh dalac.

³⁰ Jò aih èh ta tróc i kan bahian Kon Mangai loh, òiq ka mangai oe ta crǒng taneh crò hmoe, jò wì haq hnoq Kon Mangai hangui tayúc, yǒc òiq ka cwìang itai xam kan ranhòm kàn, òòeq loh ta qneq.

³¹ Haq thê deh b̄nh plình yǒc bàu ken dēh òòeq hu tagop bài mangai haq ma khoe raih loh enh pôn qngèa, enh caqnàm plình kô trùh caqnàm plình tau.

³² Manòeq, pì tamàng bàu aliah trùh long pǒc, jò hamenh nga bu plòh ramot, aih pì loq jò padrang khoe ten trùh.

³³ Hadai qmang aih òiq, jò pì hnoq bài yiniq kô, pì loq Kon mangai trùh khoe haten. Haq qnang yòng ajang trong qmang.

³⁴ Joq qnàng au doe ka pì: nang noe kô èh ùh lùch, jò bài yiniq tau qnhòq trùh.

³⁵ Plình crống taneh kô èh hnhùng, mahaq bàu au anoe ùh jò leq hnhung.

³⁶ Mahaq anoe trùh hì aih, jò aih, ùh i cabô loq, yac ka bình plình oe ta plình, yac ka Kon hanoh ùh qnì, toq cla Baq raq ma loq dèh.

³⁷ Qnhòng Nôe nèh qmang leq, jò Kon mangai hi trùh hanoh qmang aih.

³⁸ Majah qmang aih adroe ka diac kàn, wì acaq, wì ôq, wì atôc ông mai, trùh hì Nôe mùt taboang,

³⁹ wì haq ùh lòm qnì qmòe yiniq cleq hu lap trùh kô èh, trùh jò diac kàn trùh glua dìq dǝng, jò Kon mangai trùh hanoh qmang aih diq.

⁴⁰ Hì aih, baiq ngai oe ta ruàng, moeq ngai jah dèch, moeq ngai ðòeq hlài;

⁴¹ baiq ngai gucadrì, qnang pèh qmau, moeq ngai jah dèch, moeq ngai ðòeq hlài.

⁴² Qmang aih, pì ep hamang oq.

⁴³ Thê pì loq qmang kô, tàng joq cla wì craq ta hnem khoe loq jò leq i mangai atùng trùh, aih ajoq haq hamang ðòeq dǝq mangai atùng ùh jah mùt dèh ta hnim.

⁴⁴ Pì hadai ep hamang ðòeq qmang aih diq, majah qmang aih Kon mangai trùh wop jò pì ùh ngèh ka haq trùh.

⁴⁵ Mangai hapǝng leq ma ùh ta blǝq manoh rai khun rabiaq, wì craq ma khoe dèch haq broq mangai wèq hapǝng qnoeq, ðòeq hu am ka wì aih dahwèq acaq troq jò.

⁴⁶ Xôq ramot am ka haq aih, jò cla wì craq trùh hnoq haq broq qmang aih!

⁴⁷ Joq qnàng au doe ka pì, haq aih èh wì craq dèch haq broq mangai wèq dìq dǝng kùng hang

ta hnim.

⁴⁸ Mahaq, tàng mangai hapǝng qmèq, haq hèm dèh ta cliac: Jò leq wì craq men trùh,

⁴⁹ aih èh haq hì jêh bài mangai hadai abroq moeq qmang ti haq, rai acaq ôq, taqmùt ti bài mangai bù ka alac.

⁵⁰ Cla wì craq haq trùh troq hì haq ma ùh ùac, wop jò haq ùh hèm.

⁵¹ Cla wì craq jêh haq aih dahit dahoch rai alùh òdeq haq oe moeq qmang ti bài mangai patiah toq enh gùng, tanòe aih i toq kan crò hmoe rai cadrit hanenh."

25

Aliah trùh moeq jàt ngai adrùh sriu

¹ Jò aih èh diac plình tìah ka moeq jàt ngai adrùh sriu, wê ðen lam ðìh cla kon ǝng.

² Ta aih i padam ngai blùng, padam ngai rabiaq.

³ Da bài mangai blùng wê toq ðen mahaq ùh waq wê dầu.

⁴ Da bài mangai rabiaq, wê ðen rai wê dầu ta cabi.

⁵ Yàng kon ǝng xòe trùh, wì haq loh ðǝng ka gù kùì pì hmàng.

⁶ Trùh qne mang i bàu creò: Kò cla kon ǝng! Loh ðìh haq beq.

⁷ Khoe aih ðìq ðǝng bài guadrùh cadrat enh kùì rai palauq dèh ðen.

⁸ Bài mangai blùng doe ka mangai rabiaq: lah ka nhèn dầu pì daq toq bìaq ðìq, ðen nhèn khoe ten pat.

⁹ Ùh! wì aih padreò bàu, aih èh ma oe tàu ka nhèn xam ka pì. Xan pì cadàu lam tanòe wì ma

atech, hu rot ònh dầu ka cla pì, ma aih ùh hnau hòh.

¹⁰ Mahaq jò wì haq qnang lam rot dầu, cla kon òng khoe trùh. Bài mangai guadrùh ma khoe gồm qmòe jang aih, jah mùt ti haq tanòe acaq yiniang, èh wì hi clenh qmang.

¹¹ Khoe ka aih dùnh wì tau hi trùh diq, wì haq creò: Wì craq, wì craq, pèh ka nhèn qmang diq.

¹² Mahaq haq padreò bàu: “Au doe jang ka pì, au ùh qnì ka pì.”

¹³ Aih èh pì ep hamang òòeq, majah qmang aih pì ùh loq ka hì, hadai ùh qnì ka jò.

Aliah trùh talàng

¹⁴ Qmang kô hòh, diac plình tìah ka mangai padon lam hangai, haq creò dèh bài hapòng trùh hu jao dèh kùng hang ka wì aih.

¹⁵ Mangai kô haq am padam talàng, mangai tau haq am baiq talàng, mangai qnoeq hòh haq am moeq talàng, tiaq cabô leq hlàt dèh pang leq. Khoe aih haq hi lam.

¹⁶ Mangai ma khoe jah padam talàng, drah lam abroq jah tam padam talàng.

¹⁷ Hadai qmang aih, mangai ma jah baiq talàng abroq jah tam baiq talàng hòh.

¹⁸ Mahaq da mangai ma jah moeq talàng aih loh lam, chìa moeq toq trom jrùq ta taneh hu catùh òòeq hang wì craq.

¹⁹ Atiq ka aih joq dùnh cla craq wì aih wìh hlài creò ka wì haq trùh òòeq hangui hatình trong bac jènh.

²⁰ Mangai ma khoe jah padam talàng hi trùh, haq wê tam padam talàng qnoeq hòh rai doe: Wì

craq, ìh khoe am ka au padam talàng, hacô au khoe broq jah tam padam talàng qnoeq hòh.

²¹ Cla wì craq doe ka haq: Wìa! Mangai hapõng jang lem diq ka manoh, ìh khoe ùh tablòq manoh ka au enh trong qyoh, au dèch ìh broq mangai wèq yeo bàc hòh. Trùh ta kô òeòeq beq jah lem bùi ti cla craq ìh.

²² Mangai ma khoe jah baiq talàng hanoh trùh. Haq doe: Wì craq ìh khoe am ka au baiq talàng, ngan kô au khoe jah tam baiq talàng hòh.

²³ Cla wì craq padreo bàu ka haq: Wìa! mangai hapõng jang lem ùh talòq manoh, ìh khoe diq manoh ka au enh trong qyoh, au dèch ìh broq mangai wèq yeo bàc hòh. Trùh ta kô òeòeq jah lem bùi ti cla craq ìh.

²⁴ Khoe aih mangai ma khoe jah moeq talàng trùh diq, haq doe: Wì craq, au loq ìh kô mangai ùh jah blià, gat tanòe ìh ùh rai, tagop toch nòe ìh ùh caqnìh;

²⁵ aih ìq dài au yùq crè majah lam cadõc ka hlèp talàng ìh ta taneh. Ngan hacô hang ìh oe raq da ìh.

²⁶ Cla craq haq padreo bàu “Ìh qmat, mangai hapõng ùh wìa waq rai aroh! Ìh khoe loq au gat tanòe au ùh rai, tagop toch tanòe au ùh i caqnìh?

²⁷ loq qmang aih, xài ìh yõc hang qmat aràng tanòe wì padro bac, qmang aih jò au wìh hlài xài au jah yõc hlài xam xèm xam goe haq.

²⁸ Hêq, yõc hlài talàng enh haq qmat am ka mangai ma khoe jah moeq jàt talàng tau.

²⁹ Majah qmang aih, am tam ka mangai leq ma khoe i, dõq haq jah bình bauq tàu tìa hloe. Mangai

ma ùh i, qnhac ka haq i toq xit cleq dua doeh yǒc hlài yiniq haq ma khoe jah.

³⁰ Khoe aih mangai hapǒng ma ùh wìa waq aih khwênh qnìh đac hloe tanòe clam cluiq, nòe i toq kan crò hmoe rai cadrit hanenh."

Bubi wa trùu

³¹ Jò Kon Mangai ma hi trùh enh plình, taqne kan ranhòm cla haq xam òiq ka bài bình plình lam tiaq haq, jò aih haq hangui dèh tagèq ranhòm cla.

³² Òiq dǒng ka mangai tagop òiq enh ngèa ka haq, èh haq hi lah mangai kô loh khoe ka mangai tau tìah ka mangai ban triu lah triu loh khoe ka bubi.

³³ Haq òeòq trùu oe pah qma, èh bubi haq òeòq pah qngeo rađeh.

³⁴ Khoe ka aih Bùa hi doe ka mangai oe enh pah qma haq: "Trùh tacô, pì mangai ma khoe jah Baq au am xôq ramot, òeòq hu yǒc òiac plình khoe padon òeòq ka pì enh jò baxèm broq plình crǒng taneh.

³⁵ Majah qmang aih, jò au pangot pì khoe am ka au acaq, au croh ranǒng, pì khoe am ka au ôq, Au mangai tamoe ùh canau, pì khoe òìh au mùt òìh ta hnem.

³⁶ Au chac dech, pì khoe taqmàn au, au ùh hrǒc yiniq, pì wèq au, wì clèh au pì trùh hmàih ka au.

³⁷ Jò aih bài mangai taq atoq hi padreo bàu ka haq: Chuaq nhèn, nhèn lah hnoq òh pangot jò leq ma am òh acaq? Nhèn lah hnoq òh croh ranǒng jò leq ma i am òh ôq òiac?

³⁸ Nhèn lah hnoq òh broq tamoe jò leq ma hu òìh, ùh meh oe chac dech jò leq ma hu taqmàn.

³⁹ Nhèn lah hnoq ìh ùh hróc jò leq, lah hnoq wì clêh ìh jò leq ma i lam hmàih ka ìh?

⁴⁰ Bùa hi padreo bàu: “Jòq qnàng, Au doe ka pì, yiniq cleq pì khoe broq am ka mangai leq ma yì hamoq đồng oe taqne wì oh daq au, aih pì khoe broq ka au.”

⁴¹ Khoe aih, haq doe ka wì ma oe enh pah qngeo haq: “Wia ma khoe ka au, pì qmat bài mangai jiang ka ramòt, lam mùt tanòe ùnh ùh pat khoe palauq òòeq ka kiac dù xam bua da haq.

⁴² Majah qmang aih au pangot, pì ùh dùh ka am au acaq qmòe cleq, au croh ranóng pì ùh dùh am qmòe ka au cleq hu ôq,

⁴³ Au tamoe hangai, pì ùh òh au mùt ta hnim pì, Au chac dech, pì ùh taqmàn au cleq, au rai ùh hróc rai oe ta hnim tù, pì ùh wiang wèq au.”

⁴⁴ Dìq ka wì wiang padreo bàu: Chuaq nhèn, nhèn lah hnoq ìh pangot, croh ranóng, ìh tamoe jò leq, ìh chac dech jò leq, yac ka ìh oe ta hnim tù jò leq ma ùh patìh ka ìh?

⁴⁵ Bùa padreo bàu: “Jòq qnàng au doe ka pì, yiniq cleq pì ma ùh broq am ka mòeq mangai ma yì hamoq đồng oe taqne wì kô, aih pì ùh broq ka au.”

⁴⁶ Khoe èh, wì aih mùt tanòe baxa mòeq òòe, mahaq bài mangai taq atoq mùt tanòe kan rìh halình mòeq òòe.

26

Wì padon rùp Jesus

¹ Jò Chuaq Jesus khoe hêq ka hnài trong kô, haq doe dèh ka bài mangai tiaq hóc:

² “Pì loq oe baiq hì hòm hì trùh ramènh Pan cwa, Kon Mangai kô èh wì rùp, wì tiang òhnh haq talong pagat.”

³ Jò aih bài pajàu xam bài gucraq mangai Juda, tagop dabau oe ta hnim pajàu kàn, yiniq haq Caiphe,

⁴ wì aih hatình ka dabau rùp Chuaq Jesus qmang leq ma hlèp òhnh jêh òhnh.

⁵ Mahaq jò ramènh aih ùh dùh yùq ka phù cròng loq tagruàng tagràt.

Xùt dầu ka Chuaq Jesus ta Bêthani

⁶ Jò Chuaq Jesus oe ta Bêthani, ta hnim Simôn mangai bacùn,

⁷ I mòeq ngai gucadri wê mòeq toq abôq ngôc, enh dalam tah bình dầu xua thùm canaq bac, haq thia haten yôc dầu aih pùc ta gàu Chuaq Jesus jò haq qnang haqngui acaq.

⁸ Bài mangai tiaq hỏc hnoq qmang aih, wì nòeh haraya, wì òhnh: Hagleq ma loq racaih hrìn?

⁹ Dầu kô tech xài jah bàc bac, yôc bac aih ajoq jah am ka mangai pa.

¹⁰ Chuaq Jeus loq qmang aih, haq òhnh ka wì: “Hagleq pì ma tapoch ka mangai gucadri kô? Haq khoe broq mòeq yiniq òhnh jaq lem ka au.

¹¹ Jò leq ma ùh i ka manga pa oe ti pì, mahaq ma xài jò leq pì xôq i au oe ti pì.

¹² Jò haq pùc dầu kô ta chac au, aih haq khoe padon hu lòm chac au.

¹³ Joq qnàng au òhnh ka pì, Bàu lem kô jah anoe trùh pang leq ta cròng taneh kô, yiniq haq ma khoe broq ka au hì kô hadai jah anoe trùh òhnh hu hmàng trùh haq.”

Juda òq bàu taech Jesu

¹⁴ Taqne moeq jàt baiq ngai tiaq hóc, i mòeq ngai yiniq haq Juda Icariôt, lam tanòe bài pajàu kàn

¹⁵ Haq bòch wì: Pì am ka au toq leq, tàng joq au rùp haq am ka pì? Aih wì hi am ka haq pì jàt catah bac.

¹⁶ Pang aih, Juda toq rap chaq jò hu rùp Chuaq Jesus am ka wì.

Yàng acaq pajùm pulùch

¹⁷ Hì baxèm ramènh acaq bèngh ùh tah blo, bì mangai tiaq hóc thia haten ka Chuaq Jesus, wì bòch: Ìh enh nhèn padon ka ìh acaq ramènh Pancwa taleq?

¹⁸ Haq padreo bàu: “Pì mùt ta plài, glàm mòeq ngai, pì doe ka haq, Mangai hnài nhèn doe: Jò da au khoe ten trùh, au xam bài mangai tiaq hóc au acaq ramènh Pancwa ta hnìm ìh.”

¹⁹ Mangai tiaq hóc broq qmang ka bàu Chuaq ma khoe thê, aih wì haq hi padon ramènh Pancwa.

²⁰ Jò tróc khoe clam, Chuaq Jesus angèn nòe cabǝng ti wì Moeq jàt baiq ngai.

²¹ Jò wì qnang acaq, haq doe: “Joq qnàng! Au doe ka pì, i mòeq ngai taqne pì kô èh blòq au.”

²² Dìq dǝng wì ta aih loh ka mangò, khoe ka maleq trùh maleq bòch haq: Chuaq au! ùh xài ìh doe au, ajoq?

²³ Chuaq Jesus padreo bàu: “Mangai ma poh tì ta chrǝng kô ti au, aih raq mangai ma hu blòq au.”

²⁴ Kon Mangai loh lam tìah ka bàu ma khoe achìh òeq ka haq. Mahaq haǝo ka daǝeh mangai

ma blòq haq! Apa q hauang loh haq aih xan ka ùh hnau hòm.

²⁵ Judà mangai ma blòq Chuaq Jesus hadai bòch: Rabi! Joq qnàng ùh xài doe au ajoq èh? Chuaq Jesus padreo bàu: "Joq qmang ka bàu ìh khoe anoe."

²⁶ Jò qnang acaq, Chuaq Jesus yǒc bēnh, manè apôi, khoe aih goh bēnh hnhu ka mangai tiaq hǒc rai doe: "Yǒc acaq beq, kô chac au!"

²⁷ Haq yǒc chrǒng, manè apôi, khoe aih qnèp ka mangai tiaq hǒc rai doe: "Dìq ka pì ôq beq!"

²⁸ Kô mahim au, mahim da kan tajao khoe dahrôq qnoh dôq bàc ngai jah claih enh yiniq lui.

²⁹ Au doe ka pì, pang kô ta èh, au pì ôq diac pìi nho kô hòm, trùh hì au ma hì ôq diac pìi nho neo tì pì oe ta diac Baq au.

Bàu anoe òòeq ka Phier

³⁰ Khoe ka wì calêu bàu hset hadròeh, Chuaq Jesus xam mangai tiaq hǒc tǒc ta wang Ôliu.

³¹ Haq doe ka wì: "Mang kô dìq ka pì catoeh dǒng ka au! majah qmang aih khoe i bàu achìh: Au jêh mangai ban, Aih èh ãai trìu haq hì prah hapriang dǒng.

³² Mahaq atìq ka au khoe rìh hlài, au lam mùt ta gùng Galili adroe ka pì."

³³ Mahaq Phiero doe: Yac ka rìm ngai tacro cađac dǒng ìh, au dua ùh jò leq cro.

³⁴ Chuaq Jesus padreo bàu doe: "Joq qnàng au doe ka ìh, mang kô raq adroe ka ia rǒng, pìq yàng ìh hangah ðeh ùh qnì ka au".

³⁵ Dua Phiero doe: Yac ka au ep cachit ti ìh, dua au ùh hangah raðeh ùh qnì ka ìh. Bàì mangai tiaq hóc dìq capoch moeq bàù qmang aih.

Getsêmanê

³⁶ Khoe aih Chuaq Jesus xam mangai tiaq hóc lam trùh moeq nòe, jang aih wì creò yiniq haq Getsêmanê, haq doe ka wì: “Pì hangui a kô, gòm au lam waiq khàn ajang tau.”

³⁷ Haq qnung Phiero xam baiq ngai kon calô Sêbêdê tiaq haq, khoe aih haq loh ka mangò, ùh catèm ta manoh.

³⁸ Haq doe ka wì: “Ta mahua yiang au bình kan mangò trùh cachit. Pì oe ajang kô hu wiang riu ti au.”

³⁹ Lam tam yì hangai ka aih toq biaq, haq bla-op hadrò ta taneh, rai waiq khàn: “Baq au, tàng loq jah, ìh dèch chrông kô ma khoe ka au, hnoq anoe aih paq tiaq manoh au, mahaq tiaq manoh ìh.”

⁴⁰ Khoe aih haq wìh hlài nòe bàì mangai tiaq hóc hnoq wì aih khoe hliac dǝng. Haq bóch Phiero: “Pì riu ti au moeq jò dua ùh nui qmòh?”

⁴¹ Riu rai waiq khàn dǝq pì ùh hiaq clih ta kan padô qnùt. Mahua yiang aih enh haraya, mahaq chac aih ùh hlàt.”

⁴² Haq lam tam yàng baiq hòm rai waiq khàn: “Baq au, tàng joq chrông kô ùh jah lah khoe ka au, dua au ep ôq, waiq manoh Baq ma enh jah gêh.”

⁴³ Jò haq wìh hlài, haq hnoq wì kùi pi hmàng, majah qmang aih mat wì haq khoe tajìp ðeh.

44 Haq cađac wì oe ta aih, lam tam mòeq yàng hò m òeq hu waiq khàn yàng piq, yàng kô dua mòeq bàu tìah baiq yàng adroe.

45 Khoe aih haq wìh hlài nòe bài mangai tiaq hỏc, haq doe ka wì: “Pì oe raq kùi oe raq padài qmòh? Kô! khoe trùh jò, Kon Mangai kô èh wì rùp haq am ka bài mangai yiniq lui.

46 Yòng! beq bèn lam, hatau mangai blòq au khoe trùh.

Rùp Jesus

47 Jò haq oe raq capoch, cadoe Juđa aih mangai hadai oe ta mòeq jàt baiq ngai tiaq hỏc, khoe trùh, pì cajaq bài mangai wê ranac, wê chang lam ti haq, aih la bài mangai enh hnim pajàu kàn xam bài gucraq Juđa thê lam.

48 Mangai blòq Chuaq Jesus khoe tanap ka wì, haq doe: Au hìp cabô, pì rùp mangai aih raq.

49 Lam haten ka Chuaq Jeus, Juđa doe: Joq manè apôi qnàng, Rabi, khoe aih haq hi hìp Chuaq Jesus.

50 Chuaq Jesus doe: “Ìh lam tacô hu broq cleq, drah broq beq” wì aih hi thia ka haten, rùp Jesus.

51 I mòeq ngai oe mòeq qmang ti Chuaq Jeus hroe qnoh chang, jêh mangai hapổng bài pajàu, pot cìh mòeq apah don haq aih.

52 Chuaq Jeus doe ka haq: “Qmùt hlài chang qmat ta caqnop, majah qmang aih mangai leq wê chang haq aih èh cachit dèh ka chang.

53 Ìh ma xoh au ùh jah creò dèh ka Baq drah qnoh ka au loe mòeq jàt baiq calùh òhnh pình qmòh?

⁵⁴ Qmang aih, broq qmang leq ma xit tiaq bàu Hset hadròeh ma khoe achìh, yiniq kô ep loh qmang kô raq."

⁵⁵ Jò aih Chuaq Jesus doe ka wì: "Pì wê chang jaoq, long dùl lam rùp au tiàh ka lam rùp mangai atùng. Rìm hì au haqngui hnài ta hnem kùh waiq gleq pì ùh rùp au?"

⁵⁶ Mahaq dìq ka yiniq kô loh qmang kô òeòq hu pagêh ka hset hadròeh bòe pajàu ma khoe achìh." Jò aih bòe mangai tiaq hóc ma hi cadàu qnìc ka haq.

Yòng enh ngèa nòe hadrah

⁵⁷ Bài mangai rùp Chuaq Jesus qnung haq trùh hnim Caiphe, aih mangai pajàu kàn, bài mangai hnài ranenh xam bài gucraq khoe oe qmòe ta aih.

⁵⁸ Phiero tiaq tayoe enh hangai trùh ta hamlang hnim mangai pajàu kàn, haq thia hangui pajùm tì bài mangai wèq qmang mùt loh, òeòq gòm ngan qmang leq ka dèh.

⁵⁹ Jò aih bài pajàu xam dìq dǒng ka wì oe ta hnim hadarh chaq trong tapoch patiah waq ka i nen jêh đac Chuaq Jesus.

⁶⁰ Yac ka i bàc ngai tapoch qmùt oe ta aih, mahaq dua wì chaq ùh lòh qmòe moeq yiniq cleq òeòq broq nen, pulùch i baiq ngai trùh,

⁶¹ doe rameh: Mangai kô í doe: Au raliang đac hnim kùh waiq Boc Plình khoe ka aih piq hì au hi paqnàng hlài.

⁶² Mangai pajàu kàn padinh yòng bòch Chuaq Jesus: Bài wì qmat tapoch ka ìh qmang aih, ìh ùh tapoch hlài qmoeq nà bàu cleq qmòh?

⁶³ Mahaq dua Chuaq Jesus hatinh. Mangai pajàu kàn doe hò m ka haq: Au thê ìh patô Boc Plinh rìh halinh mòeq òe òe hu hapah, anoe ka nhèn loq, ìh ajoq Christ kon BocPlinh?

⁶⁴ Chuaq Jesus têu bàu: “Wop qmang ka bàu aih, qnah hò m, au doe ka pì: atìq kô èh pì hì hnoq Kon Mangai hangui enh pah qma cwàng itai Boc Plinh, haqngui ta yùc haq loh taqneq.”

⁶⁵ Mangai pajàu kàn hit dèh eo rai doe: Haq khoe tapoch bàu pì hòq qmang aih, bèn oe ep gòm tam cabô lam panhìn hò m? Pì khoe tàng bàu pì hòq aih, pì hèm qmang leq?

⁶⁶ Dìq ka wì wiang têu bàu doe: Haq qmat troq ka cachit.

⁶⁷ Wì cachôh ta hadrò haq, ramap haq, i qnah ngai tep haq.

⁶⁸ Rai doe: Aleq Christ, tapoch pajàu beq, doe ka nhèn loq cabô jêh ìh?

⁶⁹ Jò Phiero oe raq hangui ta hamlang, i moeq ngai hapõng cadri thia haten, doe ka haq: Ìh kô hanoh oe ti Jesus, mangai Galili.

⁷⁰ Mahaq enh ngèa wì aih, Phiero hangah rađeh: Au ùh qnì tàng qmòe ìh capoch cleq?

⁷¹ Jò loh atrong qmang, i mangai hapõng cadri qnoeq hò m hnoq haq, hì doe ka wì ta aih: Mangai kô hanoh oe ti Jesus mangai Naxaret.

⁷² Mahaq Phiero rai hangah rai hapah: Au joq ùh qnì qmòe ka mangai aih.

⁷³ Mòeq ahyàc hò m, bài wì oe ta aih doe: Joq qnàng ìh hadai qmoeq bua ti wì aih, bàu tapoch ìh khoe patô qnoh ìh.

⁷⁴ Phiero tapoch brùaq rai hapah cadêh: Au ma

i loq ka haq aih. Draq drinh hloe jò aih raq, ia hi rông.

⁷⁵ Phiero hmàng hlài ka bàu Chuaq Jesus ma khoe doe: Adroe ka ia rông, piq yàng ìh hangah ðeh ùh qnì ka au. Khoe aih haq hi loh enh gùng rai lam rai hmoe ra-ua.

27

¹ Trùh sroq èh, bài pajàu xam bài gucraq Juda, hatinh ka dabau chaq trong tablêq ka Chuaq Jesus hu jêh ðac haq.

² Wì kàt aràng haq ka Philat mangai cla craq wèq ðiq gùng aih.

Juda cachit

³ Jò aih, Juda mangai ma blòq Chuaq Jesus, hnoq wì khoe taqmòq yiniq lui ka Chuaq Jesus, rawòe ka raðeh khoe broq qmang aih, haq wê piq jàt cachêh bac aràng padreo hlài da bài pajàu xam bài gucraq,

⁴ haq doe: au kô khoe broq yiniq, majah qmang aih au khoe blòq caðac mahim ùh i ðeh qmoè ka yiniq lui cleq! Mahaq wì aih doe: Aih iq ep cleq ka nhèn? Lènh ka ða ìh.

⁵ Juda yòc bac aih khwênh qmùt ta hnìmh kùh waig, khoe aih loh enh gùng, lam hanòc raðeh.

⁶ Bài mangai pajàu toch bac aih, wì haq doe: Bac kô ùh khòh tah tanòe bac hadròeh, majah qmang aih bac kô khoe padrinh.

⁷ Khoe aih wì hatuàng ka dabau yòc bac aih rot ruàng mangai thòq broq padri abôq ðòeq broq nòe catùh hanang mangai cachit lìq.

⁸ Aih iq, trùh manòeq ruàng aih wì oe raq creo ruàng mahim.

⁹ Qmang aih ma khoe xit tiaq bàu pajàu Jêrêmi ma khoe anoe: "Wì yǒc piq jàt cachêh bac, aih bac caxènh mangai Israli qnoh ka Mangai wì haq ma tah hadrah,

¹⁰ wì yǒc bac aih rot ruàng mangai thòq broq abôq padri, wop qmang ka bàu Chuaq doe ka au."

¹¹ Jò Chuaq Jesus yòng enh ngèa ka cwan Philat, cwan aih bòch Chuaq Jesus: Ìh ajoq bùa mangai Judà? Chuaq Jesus padreo bàu: "Jòq qmang aih."

¹² Jò diq dǒng ka bàu pajàu kàn xam bàu gucraq wiang tah hadrah ka haq, haq ùh tèu moeq nà bàu.

¹³ Philat bòch haq: wì i bàc trong tah hadrah ka ìh, ìh ma ùh tàng?

¹⁴ Mahaq Chuaq Jesus ùh tèu moeq nà bàu, Philat loh ka dì qjaq hamàih.

¹⁵ Rìm hanam trùh hì ramènh Pancwa, cwan loq canaih moeq ngai wì ma rùp clêh ta hnim cadrong, tiaq manoh mangai Judà ma enh.

¹⁶ Jò aih i mòeq ngai xòc i qmoè tiàng wì clêh ta hnim cadrong, yiniq haq Baraba.

¹⁷ Jò wì tagop dabau khoe bàc, Philat bòch wì haq: Pì enh au caqnaih ka pì cabô? Baraba loq caqnaih Jesus, mangai ma creò Christ aih?

¹⁸ Majah qmang aih cwan aih haq loq jao manoh wì tarènh dài wì majah rùp aràng Jesus ka haq.

¹⁹ Jò Philat qnang hangui ta gèq hadrah, cadri haq thê wì lam anoe ka haq bàu kô: Ùh dùh troq dèh ka mangai taq atòq qmat, majah qmang aih hì kô jao haq qmat raq dài au ma khoe ep xalep ta kan apô.

20 Mahaq bài mangai pajàu kàn xam bài wì gucraq dua àu padô bắc ngai oe ta aih, dōq wì aih bōch cwan caqnaih Baraba ka wì haq, èh jêh đac hloe Jesus.

21 Philat bōch wì haq: Wa baiq ngai kô, pì enh au caqnaih ka pì mangai leq? Wì têu bàu: Baraba,

22 Philat doe: Tàng qmang aih ha Jesus, mangai ma creο Christ kô au broq qmang leq? Dìq dōng ka wì aih têu: Tiang đình haq qmat talong pagat!

23 Philat bōch: Hagleq? haq kô khoe broq cleq ma dù? Mahaq wì aih cachech yeo dēh hòm: Tiang đình haq qmat talong pagat!

24 Jò Philat hnoq bàu rađeh khoe pì blēq wì aih, mahaq kan tagruàng èh rai dēh, haq yōc diac qnheo dēh tì enh ngēa bài aih, haq doe: Au ùh pòq mahim mangai kô, cla pì pòq dēh!

25 Dìq ka wì wiang doe: Mahim haq mat dahrôq tagàu nhèn xam kon nhèn!

26 Khoe aih haq caqnaih Baraba ka wì, èh haq thê blai Jesus, khoe aih am ka wì lam tiang đình talong pagat.

Linh halê Jesus

27 Linh cwan aih qmùt Jesus ta hnīm kàn, tagop dabau oe dudan ka haq.

28 Wì lēh đac eo haq, caxùnh ònh ka haq eo yōh gòh.

29 Khoe aih, wì tēnh moeq toq cadoh yila, pacui tagàu haq. Wì tah moeq catoch cadia ta tì pah qma haq, wì hacùn cràng enh ngēa haq rai halê haq, wì doe: Waiq bùa mangai Judā.

30 Wì cachōh ta chac haq, yōc cadia blai tagàu haq

³¹ Atìq ka wì halê haq, wì lêh đac eo yôh gòh enh chac haq, caxùnh hlài eo da cla haq, khoe hi qnung haq lam đòeq tiang đình haq talong pagat.

Long pagat Chuaq Jesus

³² Jò wì qnang lam ti trong, wì glàm moeq ngai oe ta Siren, yiniq haq Simôn, wì thê haq xùi long pagat.

³³ Wì lam trùh ajang nòe wì ma creo Gôgotha (aih la go cadôh gàu).

³⁴ Ta aih wì am Jesus ôq alac clai pajùm ka mat xang, mahaq jò Jesus liah ngan, haq ùh waq ôq.

³⁵ Jò wì khoe tiang đình haq talong pagat, wì pàih panàih đòeq ta axong ka dabau eo yôh haq.

³⁶ Khoe aih wì hi hangui ta aih đòeq gòm ngan haq.

³⁷ Enh qnhèq ka gàu haq, wì đòeq moeq capiac long ban, wì achìh yiniq lui haq: KÔ RAQ JESUS, BÙA MANGAI JUDÀ.

³⁸ Hanoh jò aih diq, wì tiang đình baiq ngai atùng ti haq, moeq ngai apah qma ka haq, moeq ngai apah qngeo ka haq.

³⁹ Bài mangai lam pagat trong aih hnoq haq, wì do halê rai ngu ngiù gàu,

⁴⁰ wì doe: Ìh mangai ma doe đeh raliang hnem kùh waiq, èh diq piq hì raq hi broq hlài, doeh rađeh beq! Tàng joq ìh kon Bóc Plình, loh enh long pagat beq!

⁴¹ Bài pajàu kàn xam mangai hnài ranenh hloe xam bài gucraq hanoh lê haq:

⁴² Wì doe: Haq khoe dèch bàc ngai qnoeq mahaq doeh rađeh ùh jah. Tàng ìh joq bùa mangai

Israli, manòeq loh enh qmat beq, aih nhèn men lùì.

⁴³ Haq canòm ka Boc Plình, tàng joq Boc Plình loq waq ka haq, manòeq ajoq Boc Plình khe doeh haq, majah qmang aih haq khoe doe ðeh kon Boc Plình.

⁴⁴ Wa mangai atùng wì ma khoe tiang ðình talong pagat ti haq, hadai hnap ka haq qmang aih.

⁴⁵ Pang jò qne hì, trùh piq jò xèq aih, ðìq ka gùng aih tróc loh ka clam cluiq.

⁴⁶ Qnah ta piq jò, Chuaq Jesus creò ka dèh: “Êli, Êli, lam-ma-sa-bat-ta-ni?” Bàu aih ìq rameh: Boc Plình au, Boc Plình au, Gleq Ìh majah caðac au?

⁴⁷ Wì yòng haten ka aih, tàng bàu haq, wì doe: Haq creò ka Êli.

⁴⁸ Tajòe qmòe i moeq ngai tùh yóc moeq cato capaih, chùq ta diac jòq, srep agoe long cadia, dèch am ka Haq ôq.

⁴⁹ Mahaq qnah ngai qnoeq doe: Dôq haq, ngan Êli i trùh dèch haq ùh?

⁵⁰ Jesus creò tam moeq nà bàu dèh, khoe aih qnèp dèch dèh mahua yiang ka Baq. Haq hi pat.

⁵¹ Wop jò aih, bai prình haganh ta hnìmh kùh waiq dahit enh qnhèq trùh taqneq, loh baiq apah, tanèh loh ka ralàng, hmo kàn padah,

⁵² ralùng hanang tapèch, bàc hanang mangai tiaq trong hadròeh cachit rìh hlài.

⁵³ Atiq ka Chuaq Jesus rìh hlài, bài wì aih loh enh ralùng hanang, mùt ta Plài hadròeh, mahno raðeh ka bàc ngai jah hnoq.

⁵⁴ Cla craq lình xam bài mangai oe ti haq ðòeq wiang gòm hanang Chuaq Jesus, hnoq tanèh

ralàng, xam bàc yiniq qnoeq hòh, haq dìq jaq yùq crè, haq doe: Mangai kô, joq kon Boc Plinh.

⁵⁵ Bàc ngai gucadrì yòng haqmiang ðeh enh hangai, wì haq aih bài mangai ma tiaq Chuaq Jesus enh gùng Galili, tiaq ðòeq patih ka haq, hanoh oe ta aih.

⁵⁶ Ta aih i Mari Mađolen, Mari miq Jaco xam Jôsep, xam miq baiq ngai kon Sêbêdê.

Catùh Jesus

⁵⁷ Trùh mahi khoe haqneq, i moeq ngai padròng trùh enh gùng Arimathê, yiniq haq Jôsep, haq aih hanoh mangai tiaq hóc Chuaq Jesus,

⁵⁸ haq trùh ta Philat ðòeq hu bòch ahlài hanang Chuaq Jesus. Philat hi am ka haq.

⁵⁹ Jôsep yóc bai taboc lom hanang Jesus.

⁶⁰ Lam ðòeq ta ralùng haq ma neo thê wì pùng ðòeq ka raðeh tanòe hmo kàn, khoe aih, wì cadre moeq toq hmo kàn padit ajang ngah ralùng, khoe aih èh hi bròc.

⁶¹ Mari Madolen, xam bài wì qnoeq hangui tangèa ka ralùng.

⁶² Sroq èh rameh (aih hì atiq ka hì ma padon acaq ramèh), bài pajàu kànx am mangai Pharisi adràc dabau lam glàm Philat,

⁶³ wì haq doe: Wì craq! Nhèn hmàng mangai loq qnùt kô, jò haq oe rih i doe rameh: Atiq ka piq hì, au hì rih hlài.

⁶⁴ Manòeq kô, ìh am lình lam gòm ralùng hanang ma hagau haq, trùh piq hì, yùq bài mangai tiaq hóc haq loq lam atùng hanang, khoe aih anoe ka phù cròng: Haq khoe rih hlài enh kan

cachit. Kan qnùt yàng ma atìq kô yeo hamoq ka yàng adroe hòmh.

⁶⁵ Philat doe ka wì: Pì i dèh lình, lam broq tiaq dèh manoh pì ma enh beq.

⁶⁶ Qmang aih, wì haq hì lam, nìmh hadro ajang ngah ralùng, yỏc lình đòeq gòm, cla hnoq dèh hagau haraya.

28

Chuaq Jesus rìh hlài

¹ Atìq ka hì Sabat, hì baxèm ta tuàng ramènh, jò bu badrèh qngah, i Mari Madolen xam Mari qnoeq hòmh, lam ta ralùng hanang.

² I kan taneh ralàng dèh, majah qmang aih i mòeq bình plình Chuaq loh enh plình, trùh cadro hmo, èh haq hangui enh qnhèq ka hmo aih.

³ Hadrò haq qngah tìah ka camlet, eo haq taboc tìah ka yiloc.

⁴ Dài aih, bài lình gòm ralùng tarìt tariang, gang tìah ka mangai cachit.

⁵ Mahaq bình plình doe ka wì mangai gucadrì: Chôp paq yùq dèh, au loq chôp chaq Chuaq Jesus mangai wì ma tiang đình haq talong pagat.

⁶ Haq ùh oe tacô, haq khoe rìh hlài, tìah ka bàu haq khoe doe. Drah lam ngan nòe taqnguì haq beq,

⁷ èh drah lam anoe ka bua Haq loq haq khoe rìh hlài. Hacô Haq lam adroe ka pì tỏc ta Galili, ta aih èh pì hì hnoq haq. Aih au khoe doe ka pì.

⁸ Wa mangai cadrì aih drah loh enh ralùng, rai yùq crè rai manè, tùh cadàu lam anoe ka bài mangai tiaq hỏc.

⁹ Ûh xài! Chuaq Jesus loh glàm wa aih, haq doe: “Lem bùi am ka chôp!” Wa haq tùh haten ta haq, cwat jènh rai kùh waiq haq.

¹⁰ Chuaq Jesus doe: “Apaq yùq cleq, drah lam anoe ka oh daq au tồc ta Galili, ta aih èh wì jah hnoq au.

¹¹ Jò wa mangai gucadrì qnang lam roc trong, i qnah ngai lình gòm ralùng hanang mùt ta Jêrusalem taqmon hlài ka bài pajàu loq dìq dồng rìm yiniq.

¹² Bài pajàu kàn tagop pajùm ka bài gucraq òoèq hu hatinh ka dabau, jò khoe hatinh, wì haq am ka bài mangai lình bəc bəc,

¹³ wì haq tanap: Pì doe rameh oq: Damang, jò nhèn oe kùi, bài mangai tiaq hỏc haq atùng yỏc hanang aràng taqnoeq.

¹⁴ Tàng bàu kỏ loq trùh don cwan kàn, i nhèn chaq trong hu anoe ka haq, dỏq pì ùh hìaq ep yùq cleq.

¹⁵ Bài lình yỏc bəc, wì haq broq tiaq bàu tanap aih. Tagùng Judà, bàu aih oe raq trùh manoèq.

Chuaq mahno rađeh ta gùng Galili

¹⁶ Moeq jàt moeq ngai tiaq hỏc lam ta gùng Galili, wì haq tồc ta wang Chuaq Jesus ma khoe thê.

¹⁷ Jò wì hnoq haq, wì kùh waiq haq, mahaq i bìaq ngai, qnhỏq dai lùì.

¹⁸ Chuaq Jesus lam ka haten ti bài mangai tiaq hỏc, haq doe ka wì qmang kỏ: “Dìq ka cwiàng itai oe ta plình xam ta crỏng taneh khoe jao dồng ka au.

¹⁹ Qmang aih, drah lam jàp crǒng taneh ðòeq broq ka mangai oe rìm diac wìa dǒng mangai tiaq hǒc au, canòm ka hiniq Baq, hiniq Kon, hiniq Yiang Hadròeh ðòeq broq ðaptem ka wì,

²⁰ rai hnài wì wèq rìm trong au khoe hnài pì. Kô èh au oe hloe ti pì trùh hì atìq lùch.

Hset Hadròeh
The New Testament in the Hre language of Vietnam,
translated by Baq Thi

Copyright © 2024 Baq Thi

Language: (Hre)

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-23

PDF generated using Haiola and XeLaTeX on 26 Jul 2025 from source files dated 23 Jul 2025

03fbbc53-13cb-5444-945a-741163b0252d